


新

序







新 序

劉 向 著

編主五雲王

編初成集書叢

序 新

中華民國二十五年十二月初版

著 者

劉

向

發行人

王

上海河南路

雲 五

印刷所

商 務

上海河南路

印 書 館

發行所

商

上海及各埠

務 印 書 館

新序

古之治天下者一道德同風俗蓋九州之廣萬民之衆千歲之遠其教既明其政既成之後所守者一道所傳者一說而已故詩書之文歷世數十作者非一而言未嘗不相爲終始化之如此其至也當是之時異行者有誅異言者有禁防之又如此其備也故二帝三王之際及其中間嘗更衰亂而餘澤未熄之時百家衆說未有能出其間者也及周之末世先王之教化法度既廢餘澤既熄世之治方術者蓋得其一偏故人奮其私意家尚其私學者蠶起於中國皆明其所長而昧其所短務其所得而諱其所失天下之士各自爲言而不能相通世人之不復知夫學之有統道之有歸也先王之遺文雖在皆絀而不講况至於秦爲世所大禁哉漢興六藝皆得於散絕殘脫之餘世復無明先生之道爲衆說之所蔽闇

而不明鬱而不發而怪奇可喜之論各師異見皆自名家者誕漫於中國一切不異於周之末世其弊至於今尚在也自斯以來天下學者知折衷於聖人而能純於道德之美者楊雄氏而止耳如向之徒皆不免爲衆說之蔽而不知有折衷者也孟子曰待文王而後興者凡民也豪傑之士雖無文王猶興漢之士豈特無明先王之道以一之者哉亦其出於是時者豪傑之士少故不能特起於流俗之中絕學之後也蓋向之序此書於今最爲近古雖不能無失然遠至舜禹而次及於周秦以來古人之嘉言善行亦往往而在也要在慎取之而已故臣旣惜其不可見者而校其可見者特詳焉亦足以知臣之志者豈好辯哉蓋臣之不得已也編校書籍臣曾

鞏上

目錄

卷第一

雜事

卷第二

雜事

卷第三

雜事

卷第四

雜事

卷第五

雜事

卷第六

刺奢

卷第七

節士

卷第八

節士

卷第九

善謀

卷第十

善謀

新序卷第一

陽朔元年二月癸卯護左都水使者光祿大夫臣劉向上

雜事

昔者舜自耕稼陶漁而躬孝友父瞽瞍頑母嚚及弟象傲皆下愚不移舜盡孝道以供養瞽瞍與象爲浚井塗廩之謀欲以殺舜舜孝益篤出田則號泣年五十猶嬰兒慕可謂至孝矣故耕於歷山歷山之耕者讓畔陶於河濱河濱之陶者器不苦窳漁於雷澤雷澤之漁者分均及立爲天子天下化之蠻夷率服北發渠搜南撫交趾莫不慕義麟鳳在郊故孔子曰孝弟之至通於神明光于四海舜之謂也孔子在州里篤行孝道居於闕黨闕黨之子弟畋漁分有親者得多孝以化之也是以七十二子自遠方至服從其德魯有沈猶氏者旦飲羊飽之以欺市人公慎氏有妻而淫慎潰氏奢侈驕



佚魯市之鬻牛馬者善豫賈孔子將爲魯司寇沈猶氏不敢朝飲其羊公慎氏出其妻慎潰氏踰境而徙魯之鬻馬牛不豫賈布正以待之也旣爲司寇季孟墮郈費之城齊人歸所侵魯之地由積正之所致也故曰其身正不令而行

孫叔敖爲嬰兒之時出遊見兩頭蛇殺而埋之歸而泣其母問其故叔敖對曰聞見兩頭之蛇者死嚮者吾見之恐去母而死也其母曰蛇今安在曰恐他人又見殺而埋之矣其母曰吾聞有陰德者天報以福汝不死也及長爲楚令尹未治而國人信其仁也

禹之興也以塗山桀之亡也以末喜湯之興也以有莘紂之亡也以妲己文武之興也以任姒幽王之亡也以褒姒是以詩正關雎而春秋褒伯姬也樊姬楚國之夫人也楚莊王罷朝而晏問其故莊王曰今日與賢相語不知日之晏也楚姬

曰賢相爲誰王曰爲虞丘子樊姬掩口而笑王問其故曰妾  
幸得執巾櫛以侍王非不欲專貴擅愛也以爲傷王之義故  
所進與妾同位者數人矣今虞丘子爲相數十年未嘗進一  
賢知而不進是不忠也不知是不智也安得爲賢明日朝王  
以樊姬之言告虞丘子虞丘子稽首曰如樊姬之言於是辭  
位而進孫叔敖孫叔敖相楚莊王卒以霸樊姬與有力焉  
衛靈公之時蘧伯玉賢而不用彌子瑕不肖而任事衛大夫  
史鮪患之數以諫靈公而不聽史鮪病且死謂其子曰我即  
死治喪於北堂吾不能進蘧伯玉而退彌子瑕是不能正君  
也生不能正君者死不當成禮置尸北堂於我足矣史鮪死  
靈公往弔見喪在北堂問其故其子具以父言對靈公靈公  
蹴然易容寤然失位曰夫子生則欲進賢而退不肖死且不  
懈又以屍諫可謂忠而不衰矣於是乃召蘧伯玉而進之以

爲卿退彌子瑕徙喪正堂成禮而後返衛國以治史繡字子魚論語所謂直哉史魚者也

晉大夫祁奚老晉君問曰孰可使嗣祁奚對曰解狐可君曰非子之讎耶對曰君問可非問讎也晉遂舉解狐後又問孰可以爲國尉祁奚對曰午也可君曰非子之子邪對曰君問可非問子也君子謂祁奚能舉善矣稱其讎不爲諂立其子不爲比書曰不偏不黨王道蕩蕩祁奚之謂也外舉不避仇讎內舉不回親戚可謂至公矣唯善故能舉其類詩曰唯其有之是以似之祁奚有焉

楚共王有疾召令尹曰常侍筦蘇與我處常忠我以道正我以義吾與處不安也不見不思也雖然吾有得也其功不細必厚爵之申侯伯與處常縱恣吾吾所樂者勸吾爲之吾所好者先吾服之吾與處歡樂之不見戚戚也雖然吾終無得

也其過不細必亟遣之令尹曰諾明日王薨令尹即拜筮繇  
爲上卿而逐申侯伯出之境曾子曰烏之將死其鳴也哀人  
之將死其言也善言反其本性共王之謂也故孔子曰朝聞  
道夕死可矣於以開後嗣覺來世猶愈沒身不寤者也

昔者魏武侯謀事而當羣臣莫能逮朝而有喜色吳起進曰  
今者有以楚莊王之語聞者乎武侯曰未也莊王之語奈何  
吳起曰楚莊王謀事而當羣臣莫能逮朝而有憂色申公巫  
臣進曰君朝而有憂色何也莊王曰吾聞之諸侯自擇師者  
王自擇友者霸足已而羣臣莫之若者亡今以不穀之不肖  
而議於朝且羣臣莫能逮吾國其幾於亡矣吾是以有憂色  
也莊王之所以憂而君獨有喜色何也武侯逡巡而謝曰天  
使夫子振寡人之過也天使夫子振寡人之過也

衛國逐獻公晉悼公謂師曠曰衛人出其君不亦甚乎對曰

或者其君實甚也夫天生民而立之君使司牧之無使失性  
良君將賞善而除民患愛民如子蓋之如天容之若地民奉  
其君愛之如父母仰之如日月敬之如神明畏之如雷霆夫  
君神之主也而民之望也天之愛民甚矣豈使一人肆於民  
上以縱其淫而棄天地之性乎必不然矣若困民之性乏民  
之祀百姓絕望社稷無主將焉用之不去何爲公曰善

趙簡子上羊腸之坂羣臣皆偏袒推車而虎會獨擔戟行歌  
不推車簡子曰寡人上坂羣臣皆推車會獨擔戟行歌不推  
車是會爲人臣侮其主爲人臣侮其主其罪何若虎會對曰  
爲人臣而侮其主者死而又死簡子曰何謂死而又死虎會  
曰身死妻子又死若是謂死而又死君旣已聞爲人臣而侮  
其主者之罪矣君亦聞爲人君而侮其臣者乎簡子曰爲人  
君而侮其臣者何若虎會對曰爲人君而侮其臣者智者不

爲謀辯者不爲使勇者不爲鬪智者不爲謀則社稷危辯者不爲使則使不通勇者不爲鬪則邊境侵簡子曰善乃罷羣臣不推車爲士大夫置酒與羣臣飲以虎會爲上客

昔者周舍事趙簡子立趙簡子之門三日三夜簡子使人出問之曰夫子將何以令我周舍曰願爲諤諤之臣墨筆操牘隨君之後司君之過而書之日有記也月有效也歲有得也簡子悅之與處居無幾何而周舍死簡子厚葬之三年之後與諸大夫飲酒酣簡子泣諸大夫起而出曰臣有死罪而不自知也簡子曰大夫反無罪昔者吾友周舍有言曰百羊之皮不如一狐之腋衆人之唯唯不如周舍之諤諤昔紂昏昏而亡武王諤諤而昌自周舍之死後吾未嘗聞吾過也故人君不聞其非及聞而不改者亡吾國其幾於亡矣是以泣也魏文侯與士大夫坐問曰寡人何如君也羣臣皆曰君仁君

也次至翟黃曰君非仁君也曰子何以言之對曰君伐中山不以封君之弟而以封君之長子臣以此知君之非仁君文侯大怒而逐翟黃黃起而出次至任座文侯問寡人何如君也任座對曰君仁君也曰子何以言之對曰臣聞之其君仁者其臣直向翟黃之言直臣是以知君仁君也文侯曰善復召翟黃入拜爲上卿

中行寅將亡乃召其太祝而欲加罪焉曰子爲我祝犧牲不肥澤耶且齋戒不敬耶使吾國亡何也祝簡對曰昔者吾先君中行穆子皮車十乘不憂其薄也憂德義之不足也今主君有革車百乘不憂德義之薄也唯患車不足也夫舟車飾則賦斂厚賦斂厚則民怨謗詛矣且君苟以爲祝有益於國乎則詛亦將爲損世亡矣一人祝之一國詛之一祝不勝萬詛國亡不亦宜乎祝其何罪中行子乃慚

秦欲伐楚使使者往觀楚之寶器楚王聞之召令尹子西而問焉曰秦欲觀楚之寶器吾和氏之璧隨侯之珠可以示諸令尹子西對曰不知也召昭奚恤而問焉昭奚恤對曰此欲觀吾國得失而圖之不在寶器在賢臣珠玉玩好之物非寶重者王遂使昭奚恤應之昭奚恤發精兵三百人陳於西門之內爲東面之壇一爲南面之壇四爲西面之壇一秦使者至昭奚恤曰君客也請就上位東面令尹子西南面太宗子敖次之葉公子高次之司馬子反次之昭奚恤自居西面之壇稱曰客欲觀楚國之寶器楚國之所寶者賢臣也理百姓實倉廩使民各得其所令尹子西在此奉珪璧使諸侯解忿悃之難交兩國之歡使無兵革之憂太宗子敖在此守封疆謹境界不侵鄰國鄰國亦不見侵葉公子高在此理師旅整兵戎以當彊敵提枹鼓以動百萬之衆所使皆趨湯火蹈白



刃出萬死不顧一生之難司馬子反在此懷霸王之餘議攝治亂之遺風昭奚恤在此唯大國之所觀秦使者慢然無以對昭奚恤遂揖而去秦使者反言於秦君曰楚多賢臣未可謀也遂不伐楚詩云濟濟多士文王以寧斯之謂也

晉平公欲伐齊使范昭往觀焉景公賜之酒酣范昭曰願請君之樽酌公曰酌寡人之樽進之於客范昭已飲晏子曰徹樽更之樽解具矣范昭佯醉不悅而起舞謂太師曰能爲我調成周之樂乎吾爲子舞之太師曰冥臣不習范昭趨而出景公謂晏子曰晉大國也使人來將觀吾政也今子怒大國之使者將奈何晏子曰夫范昭之爲人非陋而不識禮也且欲試吾君臣故絕之也景公謂太師曰子何以不爲客調成周之樂乎太師對曰夫成周之樂天子之樂也若調之必人主舞之今范昭人臣也而欲舞天子之樂臣故不爲也范昭

歸以告平公曰齊未可伐也臣欲試其君而晏子識之臣欲犯其禮而太師知之仲尼聞之曰夫不出於樽俎之間而知千里之外其晏子之謂也可謂折衝矣而太師其與焉

晉平公浮西河中流而歎曰嗟乎安得賢士與共此樂者船人固桑進對曰君言過矣夫劍產于越珠產江漢玉產昆山此三寶者皆無足而至今君苟好士則賢士至矣平公曰固桑來吾門下食客者三千餘人朝食不足暮收市租暮食不足朝收市租吾尚可謂不好士乎固桑對曰今夫鴻鵠高飛沖天然其所恃者六翮耳夫腹下之毳背上之毛增去一把飛不爲高下不知君之食客六翮耶將腹背之毳也平公默然而不應焉

楚威王問於宋玉曰先生其有遺行耶何士民衆庶不譽之甚也宋玉對曰唯然有之願大王寬其罪使得畢其辭客有

歌於郢中者其始曰下里巴人國中屬而和者數千人其爲陽陵採薇國中屬而和者數百人其爲陽春白雪國中屬而和者數十人而已也引商刻角雜以流徵國中屬而和者不過數人是其曲彌高者其和彌寡故鳥有鳳而魚有鯨鳳鳥上擊于九千里絕浮雲負蒼天翱翔乎杳冥之上夫糞田之鴉豈能與之斷天地之高哉鯨魚朝發崑崙之墟暴鬻於碣石暮宿於孟諸夫尺澤之鯢豈能與之量江海之大哉故非獨鳥有鳳而魚有鯨也士亦有之夫聖人瑰意奇行超然獨處世俗之民又安知臣之所爲哉

晉平公閒居師曠侍坐平公曰子生無目眎甚矣子之墨墨也師曠對曰天下有五墨墨而臣不得與一焉平公曰何謂也師曠曰羣臣行賂以采名譽百姓侵冤無所告訴而君不悟此一墨墨也忠臣不用用臣不忠下才處高不肖臨賢而

君不悟此二墨墨也姦臣欺詐空虛府庫以其少才覆塞其惡賢人逐姦邪貴而君不悟此三墨墨也國貧民罷上下不和而好財用兵嗜欲無厭諂諛之人容容在旁而君不悟此四墨墨也至道不明法令不行吏民不正百姓不安而君不悟此五墨墨也國有五墨墨而不危者未之有也臣之墨墨小墨墨耳何害乎國家哉

趙文子問於叔向曰晉六將軍孰先亡乎對曰其中行氏乎文子曰何故先亡對曰中行氏之爲政也以苛爲察以欺爲明以刻爲忠以計多爲善以聚斂爲良譬之其猶鞅革者也大則大矣裂之道也當先亡

楚莊王旣討陳靈公之賊殺夏徵舒得夏姬而悅之將近之申公巫臣諫曰此女亂陳國敗其羣臣嬖女不可近也莊王從之令尹又欲取申公巫臣諫令尹從之後襄尹取之至恭

王與晉戰于鄢陵楚兵敗襄尹死其尸不反數求晉不與夏  
姬請如晉求尸楚方遣之申公巫臣將使齊私說夏姬與謀  
及夏姬行而申公巫臣廢使命道亡隨夏姬之晉令尹將徙  
其族言之於王曰申公巫臣諫先王以無近夏姬今身廢使  
命與夏姬逃之晉是欺先王也請徙其族王曰申公巫臣爲  
先王謀則忠自爲謀則不忠是厚於先王而自薄也何罪於  
先王遂不徙

新序卷第二

陽朔元年二月癸卯護左都水使者光祿大夫臣劉向上

雜事

昔者唐虞崇舉九賢布之於位而海內大康要荒來賓麟鳳  
在郊商湯用伊尹而文武用太公闕天成人任周召而海內  
大治越裳重譯祥瑞並降遂安千載皆由任賢之功也無賢  
臣雖五帝三王不能以興齊桓公得管仲有霸諸侯之榮失  
管仲而有危亂之辱虞不用百里奚而亡秦繆公用之而霸  
楚不用伍子胥而破吳闔廬用之而霸夫差非徒不用子胥  
也又殺之而國卒以亡燕昭王用樂毅推弱燕之兵破彊齊  
之讎屠七十城而惠王廢樂毅更代以騎劫兵立破亡七十  
城此父用之子不用其事可見也故闔廬用子胥以興夫差  
殺之而一有亡昭王用樂毅以勝惠王逐之而敗此的的然若

白黑秦不用叔孫通項王不用陳平韓信而皆滅漢用之而大興此未遠也夫失賢者其禍如彼用賢者其福如此人君莫不求賢以自輔然而國以亂亡者所謂賢者不賢也或使賢者爲之與不肖者議之使智者圖之與愚者謀之不肖嫉賢愚者嫉智是賢者之所以鬲蔽也所以千載不合者也或不肖用賢而不能久也或久而不能終也或不肖子廢賢父之忠臣其禍敗難一二錄也然其要在於已不明而聽衆口譖愆不行斯爲明也

魏龐恭與太子質於邯鄲謂魏王曰今一人來言市中有虎王信之乎王曰否曰二人言王信之乎曰寡人疑矣曰三人言王信之乎曰寡人信之矣龐恭曰夫市之無虎明矣三人言而成虎今邯鄲去魏遠於市議臣者過三人願王察之也魏王曰寡人知之矣及龐恭自邯鄲反讒口果至遂不得見

甘茂下蔡人也西入秦數有功至武王以爲左丞相樗里子爲右丞相樗里子及公孫子皆秦諸公子也其外家韓也數攻韓秦武王謂甘茂曰寡人欲容車至周室者其道乎韓之宜陽欲使甘茂伐韓取宜陽以通道至周室甘茂曰請約魏與伐韓令向壽輔行甘茂旣約魏魏許甘茂還至息壤謂向壽曰子歸言之王魏聽臣矣然願王勿伐也向壽歸以告王王迎甘茂於息壤問其故對曰宜陽大縣也名爲縣其實郡也今王倍數險行千里攻之難昔者曾參之處鄭人有與曾參同名姓者殺人人告其母曰曾參殺人其母織自若也頃然一人又來告之其母曰吾子不殺人有頃一人又來告其母投杼下機踰牆而走夫以曾參之賢與其母信之也然三人疑之其母懼焉今臣之賢也不若曾參王之信臣也又不如曾參之母之信曾參也疑臣者非特三人也臣恐大王投



杼也魏文侯令樂羊將而攻中山三年而拔之樂羊反而語  
功文侯示之謗書一篋樂羊再拜稽首曰此非臣之功也主  
君之力也今臣羈旅也樗里子公孫子二人挾韓而議王必  
信之是王欺魏而臣受韓之怨也王曰寡人不聽也使伐宜  
陽五月而宜陽未拔樗里子公孫子果爭之武王召甘茂欲  
罷兵甘茂曰息壤在彼王曰有之因悉起兵使甘茂將擊之  
遂拔宜陽及武王薨昭王立樗里子公孫子讒之甘茂遇罪  
卒奔齊故非至明其孰能毋用讒乎

楚王問羣臣曰吾聞北方畏昭奚恤亦誠何如江乙答曰虎  
求百獸食之得一狐狐曰子毋敢食我也天帝令我長百獸  
今子食我是逆帝命也以我爲不信吾爲子先行子隨我後  
觀百獸見我無不走虎以爲然隨而行獸見之皆走虎不知  
獸畏己而走也以爲畏狐也今王地方五千里帶甲百萬而

專任之於昭奚恤也北方非畏昭奚恤也其實畏王之兵甲也猶百獸之畏虎故人臣而見畏者是見君之威也君不用則威亡矣

魯君使宓子賤爲單父宰子賤辭去因請借善書者二人使書憲書教品魯君子之至單父使書子賤從旁引其肘書醜則怒之欲好書則又引之書者患之請辭而去歸以告魯君魯君曰子賤苦吾擾之使不得施其善政也乃命有司無得擅徵發單父單父之化大治故孔子曰君子哉子賤魯無君子者斯安取斯美其德也

楚人有獻魚楚王者曰今日漁獲食之不盡賣之不售棄之又惜故來獻也左右曰鄙哉辭也楚王曰子不知漁者仁人也蓋聞圉倉粟有餘者國有饑民一本作下民多飢後宮多幽女者下民多曠夫餘行之蓄聚於府庫者境內多貧困之民皆失君人

之道故<sup>一有</sup>庖有肥魚廩有肥馬民有餓色是以亡國之君藏於府庫寡人聞之久矣未能行也漁者知之其以此諭寡人也且今行之於是乃遣使恤鰥寡而存孤獨出倉粟發幣帛而振不足罷去後宮不御者出以妻鰥夫楚民欣欣大悅鄰國歸之故漁者一獻餘魚而楚國賴之可謂仁智矣

昔者鄒忌以鼓琴見齊宣王宣王善之鄒忌曰夫琴所以象政也遂爲王言琴之象政狀及霸王之事宣王大悅與語三日遂拜以爲相齊有稷下先生喜議政事鄒忌旣爲齊相稷下先生淳于髡之屬七十二人皆輕忌以謂設以辭鄒忌不能及乃相與俱往見鄒忌淳于髡之徒禮倨鄒忌之禮卑淳于髡等曰狐白之裘補之以弊羊皮何如鄒忌曰敬諾請不敢雜賢以不肖淳于髡曰方內而員釭如何鄒忌曰敬諾請謹門內不敢留賓客淳于髡等曰三人共牧一羊羊不得食

人亦不得息何如鄒忌曰敬諾減吏省員使無擾民也淳于  
髡等三稱鄒忌三知之如應嚮淳于髡等辭屈而去鄒忌之  
禮倨淳于髡等之禮卑故所以尚干將莫邪者貴其立斷也  
所以貴騏驥者爲其立至也必且歷日曠久乎絲釐猶能挈  
石駑馬亦能致遠是以聰明捷敏人之美材也子貢曰回也  
聞一以知十美敏捷也

昔者燕相得罪於君將出亡召門下諸大夫曰有能從我出  
者乎三問諸大夫莫對燕相曰嘻亦有士之不足養也大夫  
有進者曰亦有君之不能養士安有士之不足養者凶年飢  
歲士糟粕不厭而君之犬馬有餘穀粟隆冬烈寒士短褐不  
完四體不蔽而君之臺觀帷幪錦繡隨風飄飄而弊財者君  
之所輕死者士之所重也君不能施君之所輕而求得士之  
所重不亦難乎燕相遂慙遁逃不復敢見

晉文公出獵前驅曰前有大蛇高如隄阻道竟之文公曰寡人聞之諸侯夢惡則修德大夫夢惡則修官士夢惡則修身如是而禍不至矣今寡人有過天以戒寡人還車而反前驅曰臣聞之喜者無賞怒者無刑今禍福已在前矣不可變何不遂驅之文公曰不然夫神不勝道而妖亦不勝德禍福未發猶可化也還車反宿齋三日請於廟曰孤少犧不肥幣不厚罪一也孤好弋獵無度數罪二也孤多賦斂重刑罰罪三也請自今以來者關市無征澤梁無賦斂赦罪人舊田半稅新田不稅行此令未半旬守蛇吏夢天帝殺蛇曰何故當聖君道爲而罪當死發夢視蛇臬腐矣謁之文公曰然夫神果不勝道而妖亦不勝德奈何其無究理而任天也應之以德而已

梁君出獵見白雁羣染君下車殺弓欲射之道有行者梁君

謂行者止行者不止白雁羣駭梁君怒欲射行者其御公孫襲下車撫矢曰君止梁君忿然作色而怒曰襲不與其君而顧與他人何也公孫襲對曰昔齊景公之時天大旱三年卜之曰必以人祠乃雨景公下堂頓首曰凡吾所以求雨者爲吾民也今必使吾以人祠乃且雨寡人將自當之言未卒而天大雨方千里者何也爲有德於天而惠於民也今主君以白雁之故而欲射人襲謂主君言無異於虎狼梁君援其手與上車歸入廟門呼萬歲曰幸哉今日也他人獵皆得禽獸吾獵得善言而歸

武王勝殷得二虜而問焉曰而國有妖乎一虜答曰吾國有妖晝見星而雨血此吾國之妖也一虜答曰此則妖也雖然非其大者也吾國之妖其大者子不聽父弟不聽兄君令不行此妖之大者也

晉文公出田逐獸，碭入大澤，迷不知所出。其中有漁者，文公謂曰：「我若君也，道安從出我？」且厚賜。若漁者曰：「臣願有獻。」公曰：「出澤而受之，於是遂出澤。」公令曰：「子之所以教寡人者，何等也？」願受之。漁者曰：「鴻鵠保河海之中，厭而欲移徙之，小澤則必有九繒之憂；鼃鼃保深淵，厭而出之淺渚，則必有羅網釣射之憂。今君逐獸碭入至此，何行之太遠也！」文公曰：「善哉！」謂從者：「記漁者名。」漁者曰：「君何以名爲？」君其尊天事地，敬社稷，固四國，慈愛萬民，薄賦斂，輕租稅者，臣亦與焉。君不敬社稷，不周四國，外失禮於諸侯，內逆民心，一國流亡，漁者雖得厚賜，不能保也。」遂辭不受。曰：「君亟歸國，臣亦反吾漁所。」

晉文公逐麋而失之，問農夫。老古曰：「吾麋何在？」老古以足指曰：「如是往。」公曰：「寡人問子以足指何也？」老古振衣而起曰：「一不意人君如此也。虎豹之居也，厭閑而近人，故得魚鼈之居。」

也厭深而之淺故得諸侯厭衆而亡其國詩云維鵲有巢維  
鳩居之君放不歸人將君之於是文公恐歸遇欒武子欒武  
子曰獵得獸乎而有悅色文公曰寡人逐麋而失之得善言  
故有悅色欒武子曰其人安在乎曰吾未與來也欒武子曰  
居上位而不恤其下驕也緩今急誅暴也取人之言而弃其  
身盜也文公曰善還載老古與俱歸

扁鵲見齊桓侯立有間扁鵲曰君有疾在腠理不治將恐深  
桓侯曰寡人無疾扁鵲出桓侯曰醫之好利也欲治不疾以  
爲功居十日扁鵲復見曰君之疾在肌膚不治將深桓侯不  
應扁鵲出桓侯不悅居十日扁鵲復見曰君之疾在腸胃不  
治將深桓侯不應扁鵲出桓侯又不悅居十日扁鵲復見望  
桓侯而還走桓侯使人問之扁鵲曰疾在腠理湯熨之所及  
也在肌膚鍼石之所及也在腸胃大齊之所及也在骨髓司



命之所無奈何也今在骨髓臣是以無請也居五日桓侯體痛使人索扁鵲扁鵲已逃之秦矣桓侯遂死故良醫之治疾也攻之於腠理此事皆治之於小者也夫事之禍福亦有腠理之地故聖人蚤從事矣

莊辛諫楚襄王曰君王左州侯右夏侯從新安君與壽陵君同軒淫衍侈靡而忘國政郢其危矣王曰先生老僭歟妄爲楚國妖歟莊辛對曰臣非敢爲楚妖誠見之也君王卒近此四子者則楚必亡矣辛請留於趙以觀之於是不出十月王果亡巫山江漢鄢郢之地於是王乃使召莊辛至於趙辛至王曰嘻先生來耶寡人以不用先生言至于此爲之奈何莊辛曰君王用辛言則可不用辛言又將甚乎此庶人有稱曰亡羊而固牢未爲遲見兔而呼狗未爲晚湯武以百里王桀紂以天下亡今楚雖小絕長繼短以千里數豈特百里哉且

君王獨不見夫青蛉乎六足四翼蜚翔乎天地之間求蚊虻而食之時甘露而飲之自以爲無患與民無爭也不知五尺之童子膠絲竿加之乎四仞之上而下爲蟲蛾食已青蛉猶其小者也夫爵俛啄白粒仰棲茂樹鼓其翼奮其身自以爲無患與民無爭也不知公子王孫左把彈右攝丸定操持審參連故晝遊乎茂樹夕和乎酸鹹爵猶其小者也鴻鵠嬉遊乎江漢息留乎大沼俛啄鯉仰奮陵衡脩其六翮而陵清風庶搖高翔一舉千里自以爲無患與民無爭也不知弋者選其弓弩脩其防翳加繒繳其頸投乎百仞之上引纖繳揚微波折清風而殞故朝遊乎江河而暮調乎鼎俎鴻鵠猶其小者也蔡侯之事故是也蔡侯南遊乎高陵北徑乎巫山逐麋麇麀鹿彊谿子隨時鳥嬉遊乎高蔡之囿溢滿無涯不以國家爲事不知子發受令宣王卮以淮水填以巫山庚子之

朝纓以朱絲臣而奏之乎宣王也蔡侯之事猶其小也今君  
王之事遂以左州侯右夏侯從新安君與壽陵君淫衍侈靡  
康樂遊娛馳騁乎雲夢之中不以天下與國家爲事不知穰  
侯方與秦王謀寘之以黽厄而投之乎黽塞之外一有而字襄王大  
懼形體悼栗曰謹受令乃封莊辛爲成陵君而用計焉與舉  
淮北之地十二諸侯

魏文侯出遊見路人反裘而負芻文侯曰胡爲反裘而負芻  
對曰臣愛其毛文侯曰若不知其裏盡而毛無所恃耶明年  
東陽上計錢布十倍大夫畢賀文侯曰此非所賀我也譬無  
異夫路人反裘而負芻也將愛其毛不知其裏盡毛無所恃  
也今吾田地不加廣士民不加衆而錢十倍必取之士大夫  
也吾聞之下不安者上不可居也此非所以賀我也

楚莊王問於孫叔敖曰寡人未得所以爲國是也孫叔敖曰

國之有是衆非之所惡也臣恐王之不能定也王曰不定獨在君乎亦在臣乎孫叔敖曰國君驕士曰士非我無道貴富士驕君曰國非士無道安強人君或至失國而不悟士或至飢寒而不進君臣不合國是無道定矣夏桀殷紂不定國是而以合其取舍者爲是以爲不合其取舍者爲非故致亡而不知莊王曰善哉願相國與諸侯士大夫共定國是寡人豈敢以褊國驕士民哉

楚莊王蒞政三年不治而好隱戲社稷危國將亡士慶問左右羣臣曰王蒞政事三年不治而好隱戲社稷危國將亡胡不入諫左右曰子其入矣士慶入再拜而進曰隱有大鳥來止南山之陽三年不蜚不鳴不審其故何也王曰子其去矣寡人知之矣士慶曰臣言亦死不言亦死願聞其說王曰此鳥不蜚以長羽翼不鳴以觀羣臣之慮是鳥雖不蜚必冲

天雖不鳴鳴必驚人士慶稽首曰所願聞已王大悅士慶之問而拜之以爲令尹授之相印士慶喜出門顧左右笑曰吾王成王也中庶子聞之跪而泣曰臣尚衣冠御郎十三年矣前爲豪夫而後爲藩蔽王賜士慶相印而不賜臣臣死將有日矣王曰寡人居泥塗中子所與寡人言者內不及國家外不及諸侯如子者可富而不可貴也於是乃出其國寶璧玉以賜之曰忠信者士之行也言語者士之道路也道路不脩治士無所行矣

靖郭君欲城薛而客多以諫君告謁者無爲客通事於是有齊人曰臣願一言過一言臣請烹謁者贊客客曰海大魚因反走靖郭君曰請少進客曰否臣不敢以死戲靖郭君嘻寡人毋得已試復道之客曰君獨不聞海大魚乎網弗能止繳不能牽碣而失水陸居則螻蟻得意焉且夫齊亦君之水

也君已有齊奚以薛爲君若無齊城薛猶且無益也靖郭君大悅罷民弗城薛也

齊有婦人極醜無雙號曰無鹽女其爲人也白頭深目長肚大節昂鼻結喉肥項少髮折腰出曾皮膚若漆行年三十無所容入街嫁不售流弃莫執於是乃拂拭短褐自詣宣王願一見謂謁者曰妾齊之不售女也聞君王之聖德願備後宮之掃除頓首司馬門外唯王幸許之謁者以聞宣王方置酒於漸臺左右聞之莫不掩口而大笑曰此天下強顏女子也於是宣王乃召而見之謂曰昔先王爲寡人取妃匹皆已備有列位矣寡人今日聽鄭衛之聲謳吟感傷揚激楚之遺風今夫人不容鄉里布衣而欲千萬乘之主亦有奇能乎無鹽女對曰無有直竊慕大王之美義耳王曰雖然何喜良久曰竊嘗喜隱王曰隱固寡人之所願也試一行之言未卒忽然

不見矣。宣王大驚，立發隱書而讀之，退而惟之，又不能得明。日復更召而問之，又不以隱對。但揚目銜齒，舉手拊肘曰：「殆哉！殆哉！如此者，四。宣王曰：『願遂聞命。』無鹽女對曰：『今大王之君國也，西有衡秦之患，南有彊楚之難，外有三國之難，內聚姦臣，衆人不附。春秋四十壯男不立，不務衆子而務衆婦，尊所好而忽所恃。一旦山陵崩弛，社稷不定，此一殆也。漸臺五重，黃金白玉，琅玕龍疏，翡翠珠璣，莫落連飾，萬民罷極，此二殆也。賢者伏匿於山林，諂諛彊於左右，邪僞立於本朝，諫者不得通入，此三殆也。酒漿流湎，以夜續朝，女樂俳優，從橫大笑，外不脩諸侯之禮，內不秉國家之治，此四殆也。故曰：『殆哉！殆哉！』於是宣王掩然無聲，意入黃泉，忽然而昂喟然而嘆曰：『痛乎！無鹽君之言，吾今乃一聞寡人之殆，寡人之殆，幾不全。於是立停漸臺，罷女樂，退諂諛，去彫琢，選兵馬，實府庫，四關。

公門招進直言延及側陋擇吉日立太子進慈母顯隱女拜  
無鹽君爲王后而國大安者醜女之力也

新序卷第二





新序卷第三

陽朔元年二月癸卯護左都水使者光祿大夫臣劉向上

雜事

梁惠王謂孟子曰寡人有疾寡人好色孟子曰王誠好色於王何有王曰若之何好色可以王孟子曰大王好色詩曰古公亶父來朝走馬率西水滸至於岐下爰及姜女聿來相宇大王愛厥妃出入必與之偕當是時內無怨女外無曠夫王若好色與百姓同之民唯恐王之不好色也王曰寡人有疾寡人好勇孟子曰王若好勇於王何有王曰若之何好勇可以王孟子曰詩曰王赫斯怒爰整其旅以按徂旅以篤周祜以對于天下此文王之勇也文王一怒而安天下之民今王亦一怒而安天下之民民唯恐王之不好勇也

孫卿與臨武君議兵於趙孝成王前王曰請問兵要臨武君

對曰上得天時下得地利後之發先之至此用兵之要術也  
孫卿曰不然臣之所聞古之道凡戰用兵之術在於一民弓  
矢不調羿不能以中六馬不和造父不能以御遠士民不親  
附湯武不能以勝故善用兵者務在於善附民而已臨武君  
曰不然夫兵之所貴者勢利也所上者變詐攻奪也善用之  
者奄忽焉莫知所從出孫吳用之無敵於天下由此觀之豈  
必待附民哉孫卿曰不然臣之所言者王者之兵君人之事  
也君之所言者勢利也所上者變詐攻奪也仁人之兵不可  
詐也彼可詐者怠慢者也落單者也君臣上下之間渙然有  
離德者也若以桀詐桀猶有幸焉若以桀詐堯譬之若以卵  
投石若以脂澆沸若羽蹈烈火入則焦沒耳夫又何可詐也  
故仁人之兵鋌則若莫邪之利刃嬰之者斷銳則若莫邪之  
利鋒當之者潰圓居而方止若盤石然觸之者隴種而退耳

夫又何可詐也故仁人之兵或將三軍同力上下一心臣之於君也下之於上也若子之事父也若弟之事兄也若手足之捍頭目而覆曾腹也詐而襲之與先驚而後擊之一也夫又何可詐也且夫暴亂之君將誰與至哉彼其所與至者必其民也民之親我驩然如父母好我芳如椒蘭反顧其上如灼黥如仇讎人之情雖桀跖豈有肯爲其所惡而賊其所好者哉是猶使人之孫子自賊其父母也詩曰武王載旆有虔秉鉞如火烈烈則莫我敢曷此之謂也孝成王臨武君曰善請問王者之兵孫卿曰將率者末事也臣請列王者之事君人之法

昔者秦魏爲與國齊楚約而欲攻魏魏使人求救於秦冠蓋相望秦救不出魏人有唐且者年九十餘謂魏王曰老臣請西說秦令兵先臣出可乎魏王曰敬諾遂約車而遣之且見

秦王秦王曰丈人固然乃遂至此甚苦矣魏來求救數矣寡人知魏之急矣唐且答曰大王已知魏之急而救不至是大王籌策之臣失之也耳夫魏一萬乘之國也稱東藩受冠帶祠春秋者爲秦之彊足以爲與也今齊楚之兵已在魏郊矣大王之救不至魏急則且割地而約齊楚王雖欲救之豈有及哉是亡一萬乘之魏而彊二敵之齊楚也竊以爲大王籌策之臣失之矣秦王懼然而悟遽發兵救之馳騫而往齊楚聞之引兵而去魏氏復故唐且一說定彊秦之策解魏國之患散齊楚之兵一舉而折衝消難辭之功也孔子曰言語宰我子貢故詩曰辭之集矣民之洽矣辭之澤矣民之莫矣唐且有辭魏國賴之故不可以已

燕易王時國大亂齊閔王興師伐燕屠燕國載其寶器而歸易王死及燕國復太子立爲燕王是爲燕昭王昭王賢即位

卑身厚幣以招賢者謂郭隗曰齊因孤國之亂而襲破燕孤極知燕小力少不足以報然得賢士與共國以雪先王之醜孤之願也先生視可者得身事之隗曰臣聞古之人君有以千金求千里馬者三年不能得涓人言於君曰請求之君遣之三月得千里馬馬已死買其骨五百金反以報君君大怒曰所求者生馬安用死馬捐五百金涓人對曰死馬且市之五百金況生馬乎天下必以王爲能市馬馬今至矣於是不養年千里馬至者二今王誠欲必致士請從隗始隗且見事况賢於隗者乎豈遠千里哉於是昭王爲隗築宮而師之樂毅自魏往鄒衍自齊往劇辛自趙往士爭走燕燕王弔死問孤與百姓同甘苦二十八年燕國殷富士卒樂軼輕戰於是遂以樂毅爲上將軍與秦楚三晉合謀以伐齊樂毅之策得賢之功也

樂毅爲昭王謀必待諸侯兵齊乃可伐也於是乃使樂毅使諸侯遂合連四國之兵以伐齊大破之閔王亡逃僅以身脫匿莒樂毅追之遂屠七十餘城臨淄盡降唯莒即墨未下盡復收燕寶器而歸復易王之辱樂毅謝罷諸侯之兵而獨圍莒即墨時田單爲即墨令惠樂毅善用兵田單不能詐也欲去之昭王又賢不肯聽讒會昭王死惠王立田單使人讒之惠王惠王使騎劫代樂毅樂毅去之趙不歸燕騎劫旣爲將軍田單大喜設詐大破燕軍殺騎劫盡復收七十餘城是時齊閔王已死田單得太子於莒立爲齊襄王而燕惠王大慙自悔易樂毅以致此禍惠王乃使人遺樂毅書曰寡人不佞不能奉順君志故君捐國而去寡人不肖明矣敢謁其願而君弗肯聽也故使使者陳愚志君誠諭之語曰仁不輕絕智不輕怨君於先王世之所明知也寡人望有非則君覆蓋之

不虞君明弃之也望有過則君教誨之不虞君明罪之也寡人之罪百姓弗聞君微出明怨以弃寡人寡人必有罪矣然恐君之未盡厚矣諺曰厚者不損人以自益仁者不危軀以要名故覆人之邪者厚之行也救人之過者仁之道也世有覆寡人之邪救寡人之過非君惡所望之今君厚受德於先王之成尊輕棄寡人以快心則覆邪救過難得於君矣且世有厚薄故施異行有得失故患同今寡人任不肖之罪而君有失厚之累於爲君擇無所取國有封疆猶家之有垣墻所以合好覆惡也室不能相和出訟鄰家未爲通計也怨惡未見而明棄之未爲盡厚也寡人雖不肖未如殷紂之亂也君雖未得志未如商容箕子之累也然不內盡寡人明怨於外恐其適足以傷高義而薄於行也非然苟可以成君之高明君之義寡人雖惡名不難受也本以爲明寡人之薄而君不



得厚揚寡人之毀而君不得榮是一舉而兩失也義者不毀人以自益况傷人以自損乎願君無以寡人之不肖累往事之美昔者柳下季爲理於魯三絀而不去或曰可以去矣柳下季曰苟與人異惡往而不絀乎猶且絀也寧故國耳柳下季不以絀自累故自前業不忘不以去爲心故遠近無議寡人之罪國人不知而議寡人者天下諺曰仁不輕絕知不簡功簡功棄大者仇也輕絕厚利者怨也仇而棄之怨而累之宜在遠者不望之乎君今寡人無罪君豈怨之乎願君捐忿和怒追順先王以復教寡人寡人意君之曰余將快心以成而過不顧先王以明而惡使寡人進不得循初退不得變過此君所制唯君圖之此寡人之愚志敬以書謁之

樂毅使人獻書燕王

一有報字

曰臣不肖不能奉承王命以順左右

之心恐抵斧鉞之罪以傷先王之明有害足下之義故遁逃

自負以不肖之罪而不敢有辭說今王數之以罪恐侍御者不察先王之所以畜臣之理不白乎臣之所以事先王之心故不敢不以書對臣聞賢聖之君不以祿私親功多者授之不以官隨愛能當者處之故曰察能而授官者成功之君也論行而結交者立名之士也臣以所學觀先王舉措有高世主之心故假節於魏以身得察於燕先王過舉擢之賓客之中立之羣臣之上不謀父兄以爲亞卿臣自以爲奉令承教可幸無罪故受命而不辭先王命臣曰我有積怨深怒於齊不量輕弱欲以齊爲事臣對曰夫齊者霸王之餘業戰勝之遺事閑於兵革習於戰攻王若欲攻之必與天下圖之圖之莫若徑結趙且淮北宋地楚魏之願也趙若許約楚魏盡力四國攻之齊可大破也王曰善臣乃受命具符節南使趙願反起兵攻齊以天之道先王之靈河北之地隨先王而舉之

濟上之兵受命而勝之輕卒銳兵長驅至齊齊王遁逃走莒  
僅以身免珠玉貨寶車甲珍器皆收入燕大呂陳於元英故  
鼎反於歷室齊器設於寧臺薊丘之植植於汶篁五伯以來  
功業之盛未有及先王者也先王以爲快其志以臣不損令  
故裂地而封臣使比小國諸侯臣聞賢聖之君功立不廢故  
著於春秋蚤知之士名成而不毀故稱於後世若先王之報  
怨雪醜夷萬乘之齊收八百年之積及其弃羣臣之日餘令  
詔後嗣之義法執政任事循法令順庶孽文作餘未表執政任事是循法令順庶孽施及  
萌隸皆可以教後世臣聞善作者不必善成善始者不必善  
終昔伍子胥說聽於闔閭吳爲遠迹至郢夫差不是也賜之  
鴟夷沉之江故夫差不計先論之可以立功也沉子胥而不  
悔子胥不蚤見王之不同量也故入江而不化夫免身而全  
功以明先王之迹臣之上計也雖虧辱之誹墮先王之明臣

之大恐也臨不測之罪以幸爲利義之所不敢出也臣聞君子絕交無惡言去臣無惡聲臣雖不肖數奉教於君子臣恐侍御者親宥之說不察疏遠之行故敢以書謝

齊人鄒陽客游於梁人或讒之於孝王孝王怒繫一有而字將欲殺

之鄒陽客游見讒自寃乃從獄中上書其辭曰臣聞忠無不報信不見疑臣常以爲然徒虛語爾昔者荆軻慕燕丹之義白虹貫日太子畏之衛先生爲秦畫長平之計太白食昴昭王疑之夫精變天地而信不諭兩主豈不哀哉今臣盡忠竭誠畢義願知左右不明卒從吏訛爲世所疑是使荆軻衛先生復起而燕秦不悟也願大王孰察之昔者玉人獻寶楚王誅之李斯竭忠胡亥極刑是以箕子佯狂接輿避世恐遭此變也願大王孰察玉人李斯之意而後楚王胡亥之聽無使臣爲箕子接輿所歎臣聞比干剖心子胥鳴夷臣始不信乃

今知之願大王孰察之少加憐焉諺曰有白頭而新傾蓋而故何則知與不知也昔者樊於期逃秦之燕藉荆軻首以奉丹之事王奢去齊之魏臨城自剄以卻齊而存魏王奢樊於期非新於齊秦而故於燕魏也所以去二國死兩君者行合於志而慕義無窮也是以蘇秦不信於天下爲燕尾生白圭戰亡六城爲魏取中山何則誠有以相知也蘇秦相燕燕人惡之於燕王燕王按劍而怒食之以馱馱白圭顯於中山中山人惡之於魏文侯投以夜光之璧何則兩主二臣剖心折肝相信豈移於浮辭哉故女無美惡居宮見妒士無賢不肖入朝見嫉昔司馬喜牘於宋卒相中山范雎拉脇折齒於魏卒爲應侯此二人者皆信必然之畫捐朋黨之私挾孤獨之交故不能自免於嫉妒之人也是以申徒狄蹈流之河徐衍負石入海不容於世義不苟取比周於朝以移主上之心故

百里奚乞食於道路繆公委之以政甯戚飢牛車下而桓公任之以國此二人者豈藉宦於朝假譽於左右然後二主用之哉感於心合於行堅於膠漆昆弟不能離豈惑於衆口哉故偏聽生姦獨任成亂昔魯聽季孫之說逐孔子宋信子冉之計逐墨翟夫以孔墨之辯而不能自免何則衆口鑠金積毀消骨是以秦用由余而霸中國齊用越人子臧而彊威宣此二國豈拘於俗牽於世繫奇偏之辭哉公聽共觀垂名當世故意合則胡越爲兄弟由余子臧是也不合則骨肉爲仇讎朱象管蔡是也今人主如能用齊秦之明後宋魯之聽則五伯不足侔三王易爲比也是以聖王覺悟捐子之之心能不說於田常之賢封比干之後脩孕婦之墓故功業覆於天下何則欲善無厭也夫晉文公親其讎而彊霸諸侯齊桓公用其仇而一匡天下何則慈仁殷勤誠加於心不可以虛辭

借也至夫秦用商鞅之法東弱韓魏立彊天下而卒車裂商君越用大夫種之謀擒勁吳霸中國卒誅其身是以孫叔敖三去相而不悔於陵仲子辭三公爲人灌園今世主誠能去驕傲之心懷可報之意披心腹見情素贖肝膽施德厚終與之窮通無變於士則桀之狗可使吠堯跖之客可使刺由況因萬乘之權假聖王之資乎然則荆軻之沉七族要離燔婁子豈足爲大王道哉明月之珠夜光之璧以闇投入於道路衆無不按劍相眇者何則無因至前也蟠木根柢輪囷離奇而爲萬乘器者以左右先爲之容也故無因而至前雖出隨侯之珠夜光之璧祇足以結怨而不見得故有人先游則枯木朽株樹功而不忘今夫天下布衣窮居之士雖蒙堯舜之術挾伊管之辯素無根柢之容而欲竭精神開忠信輔人主之治則人主必襲按劍相眇之迹矣是使布衣不得爲枯

木朽株之資也是以聖王制世御俗獨化於陶鈞之上而不牽乎卑亂之言不惑乎衆多之口故秦皇帝任中庶子蒙恬之言以信荆軻之說故七首竊發周文王校獵涇渭載呂尚而歸以王天下秦信左右而弒周用烏集而王何則以其能越轡拘之見馳域外之議獨觀乎昭曠之道也今主上沈於諂諛之辭牽於帷牆之制使不羈之士與牛驥同阜此鮑焦所以忿於世而不留於富貴之樂也臣聞盛飾入朝者不以私汙義砥礪名號者不以利傷行故里名勝母而曾子不入邑號朝歌墨子回車今欲使天下寥廓之士籠於威重之權脅於位勢之貴回面汙行以事諂諛之人求親近於左右則士有伏死堀穴巖數之中耳安有盡精神而趨闕下者哉書奏孝王孝王立出之卒爲上客

申徒狄蹈流之河  
流字史作雍字

### 新序卷第三





新序卷第四

陽朔九年二月癸卯護左都水使者光祿大夫臣劉向上

雜事

管仲言齊桓公曰夫墾田勸邑闢土殖穀盡地之利則臣不若甯戚請置以爲田官登降揖讓進退閑習臣不如隰朋請置以爲大行蚤入晏出犯君顏色進諫必忠不重富貴不避死亡則臣不若東郭牙請置以爲諫臣決獄折中不誣無罪不殺無辜則臣不若弦寧請置以爲大理平原廣園車不結軌士不旋踵鼓之而三軍之士視死若歸則臣不若王子成甫請置以爲大司馬君如欲治國彊兵則此五子者足矣如欲霸王則夷吾在此夫管仲能知人桓公能任賢所以九合諸侯一匡天下不用兵車管仲之功也詩曰濟濟多士文王以寧桓公其似之矣

有司請吏於齊桓公桓公曰以告仲父有司又請桓公曰以告仲父若是者三在側者曰一則告仲父二則告仲父曷哉爲君桓公曰吾未得仲父則難已得仲父曷爲其不易也故王者勞於求人佚於得賢舜舉衆賢在位垂衣裳恭己無爲而天下治湯文用伊呂成王用周邵而刑措不用兵偃而不動用衆賢也桓公用管仲則小也故至於霸而不能以王故孔子曰小哉管仲之器蓋善其遇桓公惜其不能以王也至明主則不然所用大矣詩曰濟濟多士文王以寧此之謂也公季成謂魏文侯曰田子方雖賢人然而非有土之君也君常與之齊禮假有賢於子方者君又何以加之文侯曰如子方者非成所得議也子方仁人也仁人也者國之寶也智士也者國之器也博通士也者國之尊也故國有仁人則羣臣不爭國有智士則無四鄰諸侯之患國有博通之士則人主

尊固非成之所議也公季成自退於郊三日請罪

魏文侯弟曰季成友曰翟黃文侯欲相之而未能決以問李克克對曰君若置相則問樂商與王孫苟端孰賢文侯曰善以王孫苟端爲不肖翟黃進之樂商爲賢季成進之故相季成故知人則哲進賢受上賞季成以知賢故文侯以爲相季成翟黃皆近臣親屬也以所進者賢別之故李克之言是也孟嘗君問於白圭曰魏文侯名過於桓公而功不及五伯何也白圭對曰魏文侯師子夏友田子方敬段干木此名之所以過於桓公也卜相則曰成與黃孰可此功之所以不及五伯也以私愛妨公舉在職者不堪其事故功廢然而名號顯榮者三士翊之也如相三士則王功成豈特霸哉

晉平公問於叔向曰昔者齊桓公九合諸侯一匡天下不識其君之力乎其臣之力乎叔向對曰管仲善制割隰朋善削

縫賓胥無善純緣桓公知衣而已亦其臣之力也師曠侍曰臣請譬之以五味管仲善斷割之隰朋善煎熬之賓胥無善齊和之羹以熟矣奉而進之而君不食誰能彊之亦君之力也

昔者齊桓公與魯莊公爲柯之盟魯大夫曹劌謂莊公曰齊之侵魯至於城下城壞壓境君不圖與莊公曰嘻寡人之生不若死曹劌曰然則君請當其君臣請當其臣及會兩君就壇兩相相揖曹劌手劍拔刃而進迫桓公於壇上曰城壞壓境君不圖與管仲曰然則君何求曹劌曰願請汶陽田管仲謂桓公曰君其許之桓公許之曹劌請盟桓公遂與之盟已盟標劍而去左右曰要盟可倍曹劌可讎請倍盟而討曹劌管仲曰要盟可負而君不負曹劌可讎而君不讎著信天下矣遂不倍天下諸侯翕然而歸之爲鄆之會幽之盟諸侯莫

不至焉爲陽穀之會貫澤之盟遠國皆來南伐彊楚以致菁  
茅之貢北伐山戎爲燕開路三存亡國一繼絕世尊事周室  
九合諸侯一匡天下功次三王爲五伯長本信起乎柯之盟  
也

晉文公伐原與大夫期五日五日而原不降文公令去之吏  
曰原不過三日將降矣君不如待之君曰得原失信吾不爲  
也原人聞之曰有君義若此不可不降也遂降温人聞之亦  
請降故曰伐原而温降此之謂也於是諸侯歸之遂侵曹伐  
衛爲踐土之會温之盟後南破彊楚尊事周室遂成霸功上  
次齊桓本信由伐原也

昔者趙之中牟叛趙襄子率師伐之圍未合而城自壞者十  
堵襄子擊金而退士軍吏曰君誅中牟之罪而城自壞是天  
助也君曷爲去之襄子曰吾聞之於叔向曰君子不乘人於

利不迫人於險使之城而後攻中牟聞其義乃請降詩曰王猶允塞徐方既來此之謂也襄子遂滅知氏并代爲天下彊本由伐中牟也

楚莊王伐鄭克之鄭伯肉袒左執旄旌右執鸞刀以迎莊王曰寡人無良邊陲之臣以干天之禍是以使君王昧焉辱到弊邑君如憐此喪人錫之不毛之地唯君王之命莊王曰君之不令臣交易爲言是使寡人得見君之玉面也而微至乎此莊王親自手旌左右麾軍遠舍七里將軍子重進諫曰夫南郢之與鄭相去數千里諸大夫死者數人斯役死者數百人今克而不有無乃失民力乎莊王曰吾聞之古者孟不穿皮不蠹不出四方以是見君子重禮而賤利也要其人不要其土人告從而不赦不祥也吾以不祥立乎天下蓄之及吾身何日之有矣既而晉人之救鄭者至請戰莊王許之將

軍子重進諫曰晉彊國也道近力新楚師疲勞君請勿許莊王曰不可彊者我避之弱者我威之是寡人無以立乎天下也遂還師以逆晉寇莊王援枹而鼓之晉師大敗晉人來渡河而南及敗奔走欲渡而北卒爭舟而以刃擊引舟中之指可掬也莊王曰嘻吾兩君之不相能也百姓何罪乃退師以軼晉寇詩曰柔亦不茹剛亦不吐不侮鰥寡不畏彊禦莊王之謂也

晉人伐楚三舍不止大夫曰請擊之莊王曰先君之時晉不伐楚及孤之身而晉伐楚是寡人之過也如何其辱諸大夫也大夫曰先君之時晉不伐楚及臣之身而晉伐楚是臣之罪也請擊之莊王俛泣而起拜諸大夫晉人聞之曰君臣爭以過爲在己且君下其臣猶如此所謂上下一心三軍同力未可攻也乃夜還師孔子聞之曰楚莊王霸其有方矣下士



以一言而敵還以安社稷其霸不亦宜乎詩曰柔遠能邇以定我王此之謂也

晉文公將伐鄆趙衰言所以勝鄆文公用之而勝鄆將賞趙衰趙衰曰君將賞其末乎賞其本乎賞其末則騎乘者存賞其本則臣聞之郟虎公召郟虎曰衰言所以勝鄆遂勝將賞之曰蓋聞之子子當賞郟虎對曰言之易行之難臣言之者也公子曰子無辭郟虎不敢固辭乃受賞

梁大夫有宋就者爲邊縣令與楚鄰界梁之邊亭與楚之邊亭皆種瓜各有數梁之邊亭人勛力數灌其瓜瓜美楚人窺而稀灌其瓜瓜惡楚令因以梁瓜之美怒其亭瓜之惡也楚亭人心惡梁亭之賢已因往夜竊搔梁亭之瓜皆有死焦者矣梁亭覺之因請其尉亦欲竊往報搔楚亭之瓜尉以請宋就就曰惡是何可構怨禍之道也人惡亦惡何福之甚也若

我教子必每暮令人往竊爲楚亭夜善灌其瓜勿令知也於是梁亭乃每暮夜竊灌楚亭之瓜楚亭旦而行瓜則又皆以灌矣瓜日以美楚亭怪而察之則乃梁亭也楚令聞之大悅因具以聞楚王楚王聞之怒然愧以意自閔也告吏曰徵搔瓜者得無有他罪乎此梁之陰讓也乃謝以重幣而請交於梁王楚王時稱則祝梁王以爲信故梁楚之歡由宋就始語曰轉敗而爲功因禍而爲福老子曰報怨以德此之謂也夫人旣不善胡足効哉

梁嘗有疑獄羣臣半以爲當罪半以爲無罪雖梁王亦疑梁王曰陶之朱公以布衣富侔國是必有奇智乃召朱公而問曰梁有疑獄獄吏半以爲當罪半以爲不當罪雖寡人亦疑吾子決是奈何朱公曰臣鄙民也不知當獄雖然臣之家有二白璧其色相如也其徑相如也其澤相如也然其價一者

千金一者五百金王曰徑與色澤相如也一者千金一者五百金何也朱公曰側而視之一者厚倍是以千金梁王曰善故獄疑則從去賞疑則從與梁國大悅由此觀之牆薄則亟壞繒薄則亟裂器薄則亟毀酒薄則亟酸夫薄而可以曠日持久者殆未有也故有國畜民施政教者宜厚之而可耳

楚惠王食寒菹而得蛭因遂吞之腹有疾而不能食令尹入問曰王安得此疾也王曰我食寒菹而得蛭念謹之而不行其罪乎是法廢而威不立也非所以使國聞也謹而行其誅乎則庖宰食監法皆當死心又不忍也故吾恐蛭之見也因遂吞之令尹避席再拜而賀曰臣聞天道無親惟德是輔君有仁德天之所奉也病不爲傷是夕也惠王之後蛭出故其久病心腹之疾皆愈天之視聽不可不察也

鄭人游于鄉校以議執政之善否然明謂子產曰何不毀鄉

梭子產曰胡爲夫人朝夕游焉以議執政之善否其所善者  
吾將行之其所惡者吾將改之是吾師也如之何毀之吾聞  
爲國忠信以損怨不聞作威以防怨譬之若防川也大決所  
犯傷人必多吾不能救也不如小決之使導吾聞而樂之也  
然明曰蔑也乃今知吾子之信可事也小人實不材若果行  
此其鄭國實賴之豈惟二三臣仲尼聞是語也曰由是觀之  
人謂子產不仁吾不信也

桓公與管仲鮑叔甯戚飲酒桓公謂鮑叔姑爲寡人祝乎鮑  
叔奉酒而起曰祝吾君無忘其出而在莒也使管仲無忘其  
束縛而從魯也使甯子無忘其飯牛於車下也桓公辟席再  
拜曰寡人與二大夫皆無忘夫子之言齊之社稷必不廢矣  
此言常患困隘之時必不驕矣

桓公田至於麥丘見麥丘邑人問之子何爲者也對曰麥丘

邑人也公曰年幾何對曰八十有三矣公曰美哉壽乎子其  
以子壽祝寡人麥丘邑人曰祝主君使主君甚壽金玉是賤  
人爲寶桓公曰善哉至德不孤善言必再吾子其復之麥丘  
邑人曰祝主君使主君無羞學無惡下問賢者在傍諫者得  
人桓公曰善哉至德不孤善言必三吾子一復之麥丘邑人  
曰祝主君使主君無得罪於羣臣百姓桓公怫然作色曰吾  
聞之子得罪於父臣得罪於君未嘗聞君得罪於臣者也此  
一言者非夫二言者之匹也子更之麥丘邑人坐拜而起曰  
此一言者夫二言之長也子得罪於父可以因姑姊叔父而  
解之父能赦之臣得罪於君可以因便辟左右而謝之君能  
赦之昔桀得罪於湯紂得罪於武王此則君之得罪於其臣  
者也莫爲謝至今不赦公曰善賴國家之福社稷之靈使寡  
人得吾子於此扶而載之自御以歸禮之於朝封之以麥丘

而斷政焉

哀公問孔子曰寡人生乎深宮之中長於婦人之手寡人未嘗知哀也未嘗知憂也未嘗知勞也未嘗知懼也未嘗知危也孔子辟席曰吾君之問乃聖君之問也丘小人也何足以言之哀公曰否吾子就席微吾子無所聞之矣孔子就席曰然若入廟門升自阼階仰見榱棟俯見几筵其器存其人工君以此思哀則哀將安不至矣君昧爽而櫛冠平旦而聽朝一物不應亂之端也君以此思憂則憂將安不至矣君平旦而聽朝日昃而退諸侯之子孫必有在君之門廷者君以此思勞則勞將安不至矣君出魯之四門以望魯之四郊亡國之墟列必有數矣君以此思懼則懼將安不至矣丘聞之君者舟也庶人者水也水則載舟水則覆舟君以此思危則危將安不至矣夫執國之柄履民之上懷乎如以腐索御奔馬

易曰履虎尾詩曰如履薄冰不亦危乎哀公再拜曰寡人雖不敏請事此語矣

昔者齊桓公出遊於野見亡國故城郭氏之墟問於野人曰是爲何墟野人曰是爲郭氏之墟桓公曰郭氏者曷爲墟野人曰郭氏者善善而惡惡桓公曰善善而惡惡人之善行也其所以爲墟者何也野人曰善善而不能行惡惡而不能去是以爲墟也桓公歸以語管仲曰其入爲誰桓公曰不知也管仲曰君亦一郭氏也於是桓公招野人而賞焉

晉文公田於虢遇一田夫而問曰虢之爲虢久矣子處此故矣虢亡其有說乎對曰虢君斷則不能諫則無與也不能斷又不能用人此虢之所以亡文公以輟田而歸遇趙衰而告之趙衰曰今其人安在君曰吾不與之來也趙衰曰古之君子聽其言而用其人今之君子聽其言而弃其身哀哉晉國

之憂也文公乃召賞之於是晉國樂納善言文公卒以霸  
晉平公過九原而歎曰嗟乎此地之蘊吾良臣多矣若使死  
者起也吾將誰與歸乎叔向對曰其趙武乎平公曰子黨於  
子之師也對曰臣敢言趙武之爲人也立若不勝衣言若不  
出於口然其身舉士於白屋下者四十六人皆得其意而公  
家甚賴之及文子之死也四十六人皆就賓位是其無私德  
也臣故以爲賢也平公曰善夫趙武賢臣也相晉天下無兵  
革者九年春秋曰晉趙武之力盡得人也

葉公諸梁問樂王鮒曰晉大夫趙文子爲人何若對曰好學  
而受規諫葉公曰疑未盡之矣對曰好學智也受規諫仁也  
江出汶山其源若甕口至楚國其廣十里無他故其下流多  
也人而好學受規諫宜哉其立也詩曰其惟哲人告之話言  
順德之行此之謂也



鍾子期夜聞擊磬聲者而悲旦召問之曰何哉子之擊磬若此之悲也對曰臣之父殺人而不得臣之母得而爲公家隸臣得而爲公家擊磬臣不睹臣之母三年於此矣昨日爲舍市而睹之意欲贖之無財身又公家之有也是以悲也鍾子期曰悲在心也非在手也非木非石也悲於心而木石應之以至誠故也人君苟能至誠動於內萬民必應而感移堯舜之誠感於萬國動於天地故荒外從風鳳麟翔舞下及微物咸得其所易曰中孚豚魚吉此之謂也

勇士一呼三軍皆辟士之誠也昔者楚熊渠子夜行見寢石以爲伏虎關弓射之滅矢飲羽下視知石也却復射之矢摧無迹熊渠子見其誠心而金石爲之開况人心乎唱而不和動而不隨中必有不全者矣夫不降席而匡天下者求之已也孔子曰其身正不令而行其身不正雖令不從先王之所

以拱揖指揮而四海賓者誠德之至已形於外故詩曰王猶允塞徐方既來此之謂也

齊有彗星齊侯使祝穰之晏子曰無益也祇取誣焉天道不諂不貳其命若之何穰之也且天之有彗以除穢也君無穢德又何穰焉若德之穢穰之何損詩云惟此文王小心翼翼昭事上帝聿懷多福厥德不回以受方國君無違德方國將至何患於彗詩曰我無所監夏后及商用亂之故民卒流亡若德之回亂民將流亡祝史之爲無能補也公說乃止

宋景公時災惑在心懼召子韋而問曰災惑在心何也子韋曰災惑天罰也心宋分野也禍當君身雖然可移於宰相公曰宰相所使治國也而移死焉不祥寡人請自當也子韋曰可移於民公曰民死將誰君乎宣獨死耳子韋曰可移於歲公曰歲飢民餓必死爲人君欲殺其民以自活其誰以我爲

君乎是寡人之命固盡矣子無復言矣子韋遠走北面再拜  
曰臣敢賀君天之處高而聽卑君有仁人之言三天必三賞  
君今夕星必徙舍君延壽二十一歲公曰子何以知之對曰  
君有三善故三賞星必三舍舍行七星星當一年三七二十  
一故曰延壽二十一年臣請伏於陛下以司之星不徙臣請  
死之公曰可是夕也星三徙舍如子韋言老子曰能受國之  
不祥是謂天下之王也

宋康王時有爵生鸛於城之陬使史占之曰小而生巨必霸  
天下康王大喜於是滅滕伐薛取淮北之地乃愈自信欲霸  
之亟成故射天笞地斬社稷而焚之曰威嚴伏天地鬼神罵  
國老之諫者爲無頭之棺以示有勇剖樞者之背鏗朝涉之  
脛而國人大駭齊聞而伐之民散城不守王乃逃兒侯之館  
遂得病而死故見祥而爲不可祥反爲禍臣向愚以鴻範傳

推之宋史之占非也此黑祥傳所謂黑青者也猶魯之有鸛  
鴝爲黑祥也屬於不謀其咎急也鸛者黑色食爵大於爵害  
爵也攫擊之物貪叨之類爵而生鸛者是宋君且行急暴擊  
伐貪叨之行距諫以生大禍以自害也故爵生鸛於城陬者  
以亡國也明禍且害國也康王不悟遂以滅亡此其効也

新序卷第四

新序 卷四

新序卷第五

陽朔元年二月癸卯護左都水使者光祿大夫臣劉向上

雜事

魯哀公問子夏曰必學而後可以安國保民乎子夏曰不學而能安國保民者未嘗聞也哀公曰然則五帝有師乎子夏曰有臣聞黃帝學乎大真顓頊學乎綠圖帝嚳學乎赤松子堯學乎尹壽舜學乎務成跗禹學乎西王國湯學乎成子伯文王學乎鮫時子斯武王學乎郭叔周公學乎太公仲尼學乎老聃此十一聖人未遭此師則功業不著乎天下名號不傳乎千世詩曰不愆不忘率由舊章此之謂也夫不學不明古道而能安國家者未之有也

呂子曰神農學悉老黃帝學大真顓頊學伯夷父帝嚳學伯招帝堯學州支父帝舜學許由禹學大成執湯學小臣文王

武王學太公望周公且齊桓公學管夷吾隰朋晉文公學咎犯隨會秦穆公學百里奚公孫支楚莊王學孫叔敖沈尹筮吳王闔閭學伍子胥文之儀越王勾踐學范蠡大夫種此皆聖人之所學也且夫天生人而使其耳可以聞不學其聞則不若聾使其目可以見不學其見則不若盲使其口可以言不學其言則不若啞使其心可以智不學其智則不若狂故凡學非能益之也達天性也能全天之所生而勿敗之可謂善學者矣

湯見祝網者置四面其祝曰從天墜者從地出者從四方來者皆離吾網湯曰嘻盡之矣非桀其孰爲此湯乃解其三面置其一面更教之祝曰昔蛛蝥作網今之人循序欲左者左欲右者右欲高者高欲下者下吾取其犯命者漢南之國聞之曰湯之德及鳥獸矣四十國歸之人置四面未必得鳥湯

去三面置其一面以網四十國非徒網鳥也

周文王作靈臺及爲池沼掘地得死人之骨吏以聞於文王文王曰更葬之吏曰此無主矣文王曰有天下者天下之主也有一國者一國之主也寡人固其主又安求主遂令吏以衣棺更葬之天下聞之皆曰文王賢矣澤及朽骨又况於人乎或得寶以危國文王得朽骨以喻其意而天下歸心焉

管仲傅齊公子糾鮑叔傅公子小白齊公孫無知殺襄公公子糾奔魯小白奔莒齊人誅無知迎公子糾於魯公子糾與小白爭入管仲射小白中其帶鉤小白佯死遂先入是爲齊桓公公子糾死管仲奔魯桓公立國定使人迎管仲於魯遂立以爲仲父委國而聽之九合諸侯一匡天下爲五伯長里鳧須晉公子重耳之守府者也公子重耳出亡於晉里鳧須竊其寶貨而逃公子重耳反國立爲君里鳧須造門願見



文公方沐其謁者復文公握髮而應之曰吾鳧須耶曰然謂  
鳧須曰若猶有以面目而復見我乎謁者謂里鳧須鳧須對  
曰臣聞之沐者其心覆心覆者言悖君意沐耶何悖也謁者  
復文公見之曰若竊我貨寶而逃我謂汝猶有面目而見我  
耶汝曰君何悖也是何也鳧須曰然君反國國之半不自安  
也君寧棄國之半乎其寧有全晉乎文公曰何謂也鳧須曰  
得罪於君者莫大於鳧須矣君謂赦鳧須顯出以爲右如鳧  
須之罪重也君猶赦之況有輕於鳧須者乎文公曰聞命矣  
遂赦之明日出行國使爲右翕然晉國皆安語曰桓公任其  
賊而文公用其盜故曰明主任計不任怒闇主任怒不任計  
計勝怒者彊怒勝計者亡此之謂也

甯戚欲干齊桓公窮困無以自進於是爲商旅賃車以適齊  
暮宿於郭門之外桓公郊迎客夜開門辟賃車者執火甚盛

從者甚衆甯戚飯牛於車下望桓公而悲擊牛角疾商歌桓公聞之撫其僕之手曰異哉此歌者非常人也命後車載之桓公反至從者以請桓公曰賜之衣冠將見之甯戚見說桓公以合境內明日復見說桓公以爲天下桓公大悅將任之羣臣爭之曰客衛人去齊五百里不遠不若使人問之固賢人也任之未晚也桓公曰不然問之恐其有小惡以其小惡忘人之大美此人主所以失天下之士也且人固難全權用其長者遂舉大用之而授之以爲卿當此舉也桓公得之矣所以霸也

齊桓公見小臣稷一日三至不得見也從者曰萬乘之主布衣之士一日三至不得見亦可以止矣桓公曰不然士之傲爵祿者固輕其主其主傲霸王者亦輕其士縱夫子傲爵祿吾庸敢傲霸王乎五往而後得見天下聞之皆曰桓公猶下

布衣之士而況國君乎於是相率而朝靡有不至桓公之所  
以允合諸侯一匡天下者過士於是也詩云有覺德行四國  
順之桓公其以之矣

魏文侯過段干木之閭而軾其僕曰君何爲軾曰此非段干  
木之閭乎段干木蓋賢者也吾安敢不軾且吾聞段干木未  
嘗肯以己易寡人也吾安敢高之段干木光乎德寡人光乎  
地段干木富乎義寡人富乎財地不如德財不如義寡人當  
事之者也遂致祿百萬而時往問之國人皆喜相與誦之曰  
吾君好正段干木之敬吾君好忠段干木之隆居無幾何秦  
興兵欲攻魏司馬唐且諫秦君曰段干木賢者也而魏禮之  
天下莫不聞無乃不可加兵乎秦君以爲然乃案兵而輟不  
攻魏文侯可謂善用兵矣夫君子善用兵也不見其形而攻  
已成其此之謂也野人之用兵鼓聲則似雷號呼則動地塵

氣充天流矢如雨扶傷舉死履腸涉血無罪之民其死者已  
量於澤矣而國之存亡主之死生猶未可知也其離仁義亦  
遠矣

秦昭王問孫卿曰儒無益於人之國孫卿曰儒者法先王隆  
禮義謹乎臣子而能致貴其上者也人主用之則進在本朝  
置而不用則退編百姓而敵必爲順下矣雖窮困凍餒必不  
以邪道爲食無置錐之地而明於持社稷之大計叫呼而莫  
之能應然而通乎裁萬物養百姓之經紀勢在人上則王公  
之才也在人下則社稷之臣國君之寶也雖隱於窮閭漏屋  
人莫不貴之道誠存也仲尼爲魯司寇沈猶氏不敢朝飲其  
羊公慎氏出其妻慎潰氏喻境而走魯之鬻牛馬不豫賣布  
正以待之也居於闕黨闕黨之子弟固吾分有親者取多孝  
悌以化之也儒者在本朝則美政在下位則美俗儒之爲人

下如是矣王曰然則其爲人上何如孫卿對曰其爲人也廣大矣志意定乎內禮節脩乎朝法則度量正乎官忠信愛利形乎下行一不義殺一無罪而得天下不爲也若義信乎人矣通於四海則天下之外應之而懷之是何也則貴名白而天下治也故近者誦謳而樂之遠者竭走而趨之四海之內若一家通達之屬莫不從服夫是之謂人師詩曰自西自東自南自北無思不服此之謂也夫其爲人下也如彼爲人上也如此何爲其無益人之國乎昭王曰善

田贊衣儒衣而見荆王荆王曰先生之衣何其惡也贊對曰衣又有惡此者荆王曰可得而聞邪對曰甲惡於此王曰何謂也對曰冬日則寒夏日則熱衣無惡於甲者矣贊貧故衣惡也今大王萬乘之主也富厚無敵而好衣人以甲臣竊爲大王不取也意者爲其義耶甲兵之事折人之首剗人之腹

墮人城郭係人子女其名尤甚不榮意者爲其貴邪苟慮害人人亦必慮害之苟慮危人人亦必慮危之其貴人甚不安之二者爲大王無取焉荆王無以應也昔衛靈公問陣孔子言俎豆賤兵而貴禮也夫儒服先王之服也而荆王惡之兵者國之凶器也而荆王喜之所以屈於田贊而危其國也故春秋曰善爲國者不師此之謂也

哀公問於孔子曰寡人聞之東益宅不祥信有之乎孔子曰不祥有五而東益不與焉夫損人而益己身之不祥也棄老取幼家之不祥也釋賢用不肖國之不祥也老者不教幼者不學俗之不祥也聖人伏匿天下之不祥也故不祥有五而東益不與焉詩曰各敬爾儀天命不又未聞東益之與爲命也

顏淵侍魯定公于臺東野畢御馬于臺下定公曰善哉東野

畢之御顏淵曰善則善矣雖然其馬將失定公不悅以告左  
右曰吾聞之君子不讒人君子亦讒人乎顏淵不悅歷階而  
去須臾馬敗聞矣定公躐席而起曰趨駕請顏淵顏淵至定  
公曰向寡人曰善哉東野畢御也吾子曰善則善矣雖然其  
馬將失矣不識君子何以知之也顏淵曰臣以政知之昔者  
舜工於使人造父工於使馬舜不窮於其民造父不盡其馬  
是以舜無失民造父無失馬今東野畢之御也上車執轡御  
體正矣周旋步驟朝禮畢矣歷險致遠而馬力殫矣然求不  
已是以知其失也定公曰善可少進與顏淵曰獸窮則觸鳥  
窮則啄人窮則詐自古及今有窮其下能無危者未之有也  
詩曰執轡如組兩駟如舞善御之謂也定公曰善哉寡人之  
過也

孔子北之山戎氏有婦人哭於路者其哭甚哀孔子立輿而

問曰曷爲哭哀至於此也婦人對曰往年虎食我夫今虎食我子是以哀也孔子曰嘻若是則曷爲不去也曰其政平其吏不苛吾以是不能去也孔子顧子貢曰弟子記之夫政之不平而吏苛乃甚於虎狼矣詩曰降喪飢饉斬伐四國夫政不平也乃斬伐四國而况二人乎其不去宜哉

魏文侯問李克曰吳之所以亡者何也李克對曰數戰數勝文侯曰數戰數勝國之福也其所以亡何也李克曰數戰則民疲數勝則主驕以驕主治疲民此其所以亡也是故好戰窮兵未有不亡者也

趙襄子問於王子維曰吳之所以亡者何也對曰吳君去而不忍襄子曰宜哉吳之亡也去則一作而不能賞賢不忍則不能罰姦賢者不賞有罪不能罰不亡何待

孔子侍坐於季孫季孫之宰通曰君使人假馬其與之乎孔



子曰吾聞取於臣謂之取不曰假季孫悟告宰曰自今以來君有取謂之取無曰假故孔子正假馬之名而君臣之義定矣論語曰必也正名詩曰無易由言無曰苟矣可不慎乎

君子曰天子居闔闕之中帷帳之內廣廈之下旃茵之上不出檐幄而知天下者以有賢左右也故獨視不如與衆視之明也獨聽不如與衆聽之聰也

晉平公問於叔向曰國家之患孰爲大對曰大臣重祿而不極諫近臣畏罰而不敢言下情不上通此患之大者也公曰善於是令國曰欲進善言謁者不通罪當死

楚人有善相人所言無遺策聞於國莊王見而問於情對曰臣非能相人能觀人之交也布衣也其交皆孝悌篤謹畏令如此者其家必日益身必日安此所謂吉人也官事君者也其交皆誠信有好善如此者事君日益官職日進此所謂吉

士也主明臣賢左右多忠主有失皆敢分爭正諫如此者國日安主日尊天下日富此之謂吉主也臣非能相人能觀人之交也莊王曰善於是乃招聘四方之士夙夜不懈遂得孫叔敖將軍子重之屬以備卿相遂成霸功詩曰濟濟多士文王以寧此之謂也

齊閔王亡居衛晝日步走謂公玉丹曰我已亡矣而不知其故吾所以亡者其何哉公玉丹對曰臣以王爲已知之矣王故尚未之知邪王之所以亡者以賢也以天下之主皆不肖而惡王之賢也因相與合兵而攻王此王之所以亡也閔王慨然太息曰賢固若是其苦邪丹又謂閔王曰古人有辭天下無憂色者臣聞其聲於王見其實王名稱東帝實有天下去國居衛容貌充盈顏色發揚無重國之意王曰甚善丹知寡人自去國而居衛也帶三益矣遂以自賢驕盈不止閔王

亡走衛衛君避宮舍之稱臣而供具閔王不遜衛人侵之閔  
王去走鄒魯有驕色鄒魯不納遂走莒楚使淖齒將兵救齊  
因相閔王淖齒擢閔王之筋而懸之廟梁宿昔而殺之而與  
之共分齊地悲夫閔公臨大齊之國地方數千里然而兵敗  
於諸侯地奪於燕昭宗廟喪亡社稷不祀宮室空虛身亡逃  
竄甚於徒隸尚不知所以亡甚可痛也猶自以爲賢豈不哀  
哉公玉丹徒隸之中而道之諂佞甚矣閔王不覺追而善之  
以辱爲榮以憂爲樂其亡晚矣而卒見殺先是靖郭君殘賊  
其百姓害傷其羣臣國人將背叛共逐之其御知之豫裝齋  
食及亂作靖郭君出亡至於野而飢其御出所裝食進之靖  
郭君曰何以知之而齋食對曰君之暴虐其臣下之謀久矣  
靖郭君怒不食曰以吾賢至聞也何謂暴虐其御懼曰臣言  
過也君實賢唯羣臣不肖共害賢然後靖郭君悅然後食故

齊閔王靖郭君雖至死亡終身不諭者也悲夫

宋昭公出亡至於鄙喟然歎曰吾知所以亡矣吾朝臣千人發政舉吏無不曰吾君聖者侍御數百人被服以立無不曰吾君麗者內外不聞吾過是以此由宋君觀之人主之所以離國家失社稷者諂諛者衆也故宋昭亡而能悟蓋得反國云

秦二世胡亥之爲公子也昆弟數人詔置酒饗羣臣召諸子諸子賜食先罷胡亥下堦視羣臣陳履狀善者因行踐敗而去諸子聞見之者莫不太息及二世卽位皆知天下必弃之也故二世惑於趙高輕大臣不顧下民是以陳勝奮臂於關東閻樂作亂於望夷閻樂趙高之堦也爲咸陽令詐爲逐賊將吏卒入望夷宮攻射二世就數二世欲加刃二世懼入將自殺有一宦者從之二世謂曰何謂至於此也宦者曰如此

久矣二世曰子何不早言對曰臣以不言故得至於此使臣言死久矣然後二世喟然悔之遂自殺

齊侯問於晏子曰忠臣之事君也何若對曰有難不死出亡不送君曰列地而與之疏爵而貴之君有難不死出亡不送可謂忠乎對曰言而見用終身無難臣奚死焉諫而見從終身不亡臣奚送焉若言不見用有難而死是妄死也諫不見從出亡而送是詐爲也故忠臣也者能盡善與君而不能與陷於難

宋玉因其友以見於楚襄王襄王待之無以異宋玉讓其友其友曰夫薑桂因地而生不因地而辛婦人因媒而嫁不因媒而親子之事王未耳何怨於我宋玉曰不然昔者齊有良兔曰東郭橐蓋一旦而走五百里於是齊有良狗曰韓盧亦一旦而走五百里使之遙見而指屬則雖韓盧不及衆兔之

塵若躡迹而縱縹則雖東郭饒亦不能離今子之屬臣也躡迹而縱縹與遙見而指屬與詩曰將安將樂弃我如遺此之謂也其友人曰僕人有過僕人有過

宋王事楚襄王而不見察意氣不得形於顏色或謂曰先生何談說之不揚計畫之疑也宋玉曰不然子獨不見夫玄螭乎當其居桂林之中峻葉之上從容游戲超騰往來龍興而鳥集悲嘯長吟當此之時雖羿逢蒙不得正目而視也及其在枳棘之中也恐懼而悼慄危視而躡行衆人皆得意焉此皮筋非加急而體益短也處勢不便故也夫處勢不便豈可以量功校能哉詩不云乎駕彼四牡四牡項領夫久駕而長不得行項領不亦宜乎易曰臀無膚其行赳赳此之謂也

田饒事魯哀公而不見察田饒謂魯哀公曰臣將去君而鴻鵠舉矣哀公曰何謂也田饒曰君獨不見夫雞乎頭戴冠者

文也足傳距者武也敵在前敢鬪者勇也見食相呼仁也守夜不失時信也雞雖有此五者君猶日淪而食之何則以其所從來近也夫鴻鵠一舉千里止君園池食君魚鼈啄君菽粟無此五者君猶貴之以其所從來遠也臣請鴻鵠舉矣哀公曰止吾書子之言也田饒曰臣聞食其食者不毀其器蔭其樹者不折其枝有士不用何書其言爲遂去之燕燕立以爲相三年燕之政大平國無盜賊哀公聞之慨然太息爲之避寢三月抽損上服曰不慎其前而悔其後何可復得詩曰逝將去汝適彼樂土樂土樂土爰得我所春秋曰少長於君則君輕之此之謂也

子張見魯哀公七日而哀公不禮託僕夫而去曰臣聞君好士故不遠千里之外犯霜露冒塵垢百舍重趼不敢休息以見君七日而君不禮君之好士也有似葉公子高之好龍也

葉公子高好龍鉤以寫龍鑿以寫龍屋室雕文以寫龍於是夫龍聞而下之窺頭於牖拖尾於堂葉公見之弃而還走失其魂魄五色無主是葉公非好龍也好夫似龍而非龍者也今臣聞君好士故不遠千里之外以見君七日不禮君非好士也好夫似士而非士者也詩曰中心藏之何日忘之敢託而去

昔者楚丘先生行年七十披裘帶索往見孟嘗君欲趨不能進孟嘗君曰先生老矣春秋高矣何以教之楚丘先生曰噫將我而老乎噫將使我追車而赴馬乎投石而超距乎逐麋鹿而搏豹虎乎吾已死矣何暇老哉噫將使我出正辭而當諸侯乎決嫌疑而定猶豫乎吾始壯矣何老之有益嘗君逡巡避席面有愧色詩曰老夫灌灌小子躑躑言老夫欲盡其謀而少者驕而不受也秦穆公所以敗其師殷紂所以亡天



下也故書曰黃髮之言則無所愆詩曰壽骨與試美用老人之言以安國也

齊有閭丘邛年十八道遮宣王曰家貧親老願得小仕宣王曰子年尚稚未可也閭丘邛對曰不然昔有顛頊行年十二而治天下秦項橐七歲爲聖人師由此而觀之邛不肖耳年不稚矣宣王曰未有咫尺駢駒而能服重致遠者也由此觀之夫士亦華髮墮顛而後可用耳閭丘邛曰不然夫尺有所短寸有所長驂騑騏驎天下之俊馬也使之與狸鼬試於釜竈之間其疾未必能過狸鼬也黃鵠白鶴一舉千里使之與燕服翼試之堂廡之下廬室之間其便未必能過燕服翼也辟閭巨闕天下之利器也擊石不缺刺石不銓使之與管橐決目出昧其便未必能過管橐也由此觀之華髮墮顛與邛何以異哉宣王曰善子有善言何見寡人之晚也邛對曰夫

雞豚謹噉即奪鐘鼓之音雲霞充咽則奪日月之明讒人在側是以見晚也詩曰聽言則對譖言則退庸得進乎宣王拊軾曰寡人有過遂載與之俱歸而用焉故孔子曰後生可畏安知來者之不如今此之謂也

荆人卞和得玉璞而獻之荆厲王使玉尹相之曰石也王以和爲謾而斷其左足厲王薨武王即位和復奉玉璞而獻之武王武王使玉尹相之曰石也又以爲謾而斷其右足武王薨共王即位和乃奉玉璞而哭於荆山中三日三夜泣盡而繼之以血共王聞之使人問之曰天下刑之者衆矣子獨何哭之悲也對曰寶玉而名之曰石貞士而戮之以謾此臣之所以悲也共王曰惜矣吾先王之聽難剖石而易斬人之足天死者不可生斷者不可屬何聽之殊也乃使人理其璞而得寶焉故名之曰和氏之璧故曰珠玉者人主之所貴也和

雖獻寶而美未爲玉尹用也進寶且若彼之難也況進賢人乎賢人與姦臣猶仇讎也於庸君意不合夫欲使姦臣進其讎於不合意之君其難萬倍於和氏之璧又無斷兩足之臣以推其難猶拔山也千歲一合若繼踵然後霸王之君興焉其賢而不用不可勝載故有道者之不戮也宜白玉之璞未獻耳

新序卷第六

陽朔元年二月癸卯護左都水使者光祿大夫臣劉向上

刺奢

桀作瑤臺罷民力殫民財爲酒池糟隄縱靡靡之樂一鼓而牛飲者三千人羣臣相持歌曰江水沛沛兮舟楫敗兮我王廢兮趣歸薄兮薄亦大兮又曰樂兮樂兮四牡蹻兮六轡沃兮去不善而從善何不樂兮伊尹知天命之至舉觴而告桀曰君王不聽臣之言亡無日矣桀拍然而作啞然而笑曰子何妖言吾有天下如天之有日也日有亡乎日亡吾亦亡矣於是接履而趨遂適湯湯立爲相故伊尹去官入殷殷王而復亡

紂爲鹿臺七年而成其大三里高千尺臨望雲雨作炮烙之刑戮無辜奪民力寬暴施於百姓慘毒加於大臣天下叛之

願臣文王及周師至令不行於左右悲夫當是時求爲匹夫不可得也紂自取之也

魏王將起中天臺令曰敢諫者死許綰負操鍤入曰聞大王將起中天臺臣願加一力王曰子何力有加綰曰雖無力能商臺王曰若何曰臣聞天與地相去萬五千里今王因而半之當起七阡五百里之臺高旣如是其趾須方八千里盡王之地不足以爲臺趾古者堯舜建諸侯地方五千里王必起此臺先以兵伐諸侯盡有其地猶不足又伐四夷得方八千里乃足以爲臺趾材木之積人徒之衆倉廩之儲數以萬億度八千里之外當定農畝之地足以奉給王之臺者臺具以備乃可以作魏王默然無以應乃罷起臺

衛靈公以天寒鑿池宛春諫曰天寒起役恐傷民公曰天寒乎宛春曰君衣狐裘坐熊席隕隅有竈是以不寒今民衣弊

不補履決不直君則不寒民誠寒矣公曰善令罷役左右諫曰君鑿池不知天寒以宛春知而罷役是德歸宛春怨歸於君公曰不然宛春魯國之匹夫吾舉之民未有見焉今將令民以此見之且春也有善寡人有春之善非寡人之善與靈公論宛春可謂知君之道矣

齊宣王爲大室大蓋百畝堂上三百戶以齊國之大具之三年而未能成羣臣莫敢諫者香居問宣王曰荆王釋先王之禮樂而爲淫樂敢問荆邦爲有主乎王曰爲無主敢問荆邦爲有臣乎王曰爲無臣居曰今王爲大室三年不能成而羣臣莫敢諫者敢問王爲有臣乎王曰爲無臣香居曰臣請避矣趨而出王曰香子留何諫寡人之晚也遽召尚書曰書之寡人不肖好爲大室香子止寡人也

趙襄子飲酒五日五夜不廢酒謂侍者曰我誠邦士也夫飲

酒五日五夜矣而殊不病優莫曰君勉之不及紂二日耳紂七日七夜今君五日曩子懼謂優莫曰然則吾亡乎優莫曰不亡曩子曰不及紂二日耳不亡何待優莫曰桀紂之亡也過湯武今天下盡桀也而君紂也桀紂並世焉能相亡然亦殆矣

齊景公飲酒而樂釋衣冠自鼓缶謂侍者曰仁人亦樂是夫梁丘子曰仁人耳目亦猶人也奚爲獨不樂此也公曰速駕迎晏子晏子朝服以至公曰寡人甚樂此樂也願與夫子共之請去禮晏子對曰君之言過矣齊國五尺之童子力盡勝嬰而又勝君所以不敢亂者畏禮也上若無禮無以使其下下若無禮無以事其上夫麋鹿唯無禮故父子同麋人之所以貴於禽獸者以有禮也詩曰人而無禮胡不遄死故禮不可去也公曰寡人無良左右淫酒寡人以此至於此請殺之晏

子曰左右何罪君若好禮左右有禮者至無禮者去君若惡禮亦將如之公曰善請革衣冠更受命乃廢酒而更尊朝服而坐觴三行晏子趨出

魏文侯見箕季其牆壞而不築文侯曰何爲不築對曰不時其牆枉而不端問曰何不端曰固然從者食其園之桃箕季禁之少焉日晏進糲餐之食瓜瓠之羹文侯出其僕曰君亦無得於箕季矣曩者進食臣竊窺之糲餐之食瓜瓠之羹文侯曰吾何無得於季也吾一見季而得四焉其牆壞不築云待時者教我無奪農時也牆枉而不端對曰固然者是教我無侵封疆也從者食園桃箕季禁之豈愛桃哉是教我下無侵上也食我以糲餐者季豈不能具五味哉教我無多斂於百姓以省飲食之養也

士尹池爲荆使於宋司城子罕止而觴之南家之牆擁於前



而不直西家之潦經其宮而不止士尹池問其故司城子罕曰南家工人也爲鞆者也吾將徙之其父曰吾恃爲鞆已食三世矣今徙是宋邦之求鞆者不知吾處也吾將不食願相國之憂吾不食也爲是故吾不徙西家高吾宮卑潦之經吾宮也利爲是故不禁也士尹池歸荆適與兵欲攻宋士尹池諫於王曰宋不可攻也其主賢其相仁賢者得民仁者能用人攻之無功爲天下笑楚釋宋而攻鄭孔子聞之曰夫修之於廟堂之上而折衝於千里之外者司城子罕之謂也

魯孟獻子聘於晉宣子觴之三徙鍾石之懸不移而具獻子曰富哉家宣子曰子之家孰與我家富獻子曰吾家甚貧惟有二士曰顏回茲無靈者使吾邦家安平百姓和協惟此二者耳吾盡於此矣客出宣子曰彼君子也以畜賢爲富我鄙人也以鍾石金玉爲富孔子曰孟獻子之富可著於春秋

鄒穆公有令食鳧雁必以糝無得以粟於是倉無糝而求易於民二石粟而得一石糝吏以爲費請以粟食之穆公曰去非汝所知也夫百姓飽牛而耕暴背而耘勤而不惰者豈爲鳥獸哉粟米人之上食奈何其以養鳥且爾知小計不知大會周諺曰囊漏貯中而獨不聞歟夫君者民之父母取倉之粟移之於民此非吾之粟乎鳥苟食鄒之糝不害鄒之粟也粟之在倉與在民於我何擇鄒民聞之皆知私積與公家爲一體也此之謂知富邦

新序卷第六



新序卷第七

陽朔元年二月癸卯護左都水使者光祿大夫臣劉向上

節士

堯治天下伯成子高爲諸侯焉堯授舜舜授禹伯成子高辭爲諸侯而耕禹往見之則耕在野禹趨就下位而問焉曰昔者堯治天下吾子立爲諸侯焉堯授舜吾子猶存焉及吾在位子辭諸侯而耕何故伯成子高曰昔堯之治天下舉天下而傳之他人至無欲也擇賢而與之其位至公也以至無欲至公之行示天下故不賞而民勸不罰而民畏舜亦猶然今君賞罰而民欲且多私是君之所懷者私也百姓知之貪爭之端自此始矣德自此衰刑自此繁矣吾不忍見以是野處也今君又何求而見我君行矣無留吾事耕而不顧書曰旁施象刑維明及禹不能春秋曰五帝不告誓信厚也

桀爲酒池足以運舟糟丘足以望七里一鼓而牛飲者三千人關龍逢進諫曰爲人君身行禮義愛民節財故國安而身壽也今君用財若無盡用人若恐不能死不革天禍必降而誅必至矣君其革之立而不去朝桀囚拘之君子聞之曰未之念矣夫

紂作炮烙之刑王子比干曰主暴不諫非忠臣也畏死不言非勇士也見過則諫不用則死忠之至也遂進諫三日不去朝紂因而殺之詩曰昊天太憮子慎無辜無辜而死不亦哀哉

曹公子喜時字子臧曹宣公子也宣公與諸侯伐秦卒於師曹人使子臧迎喪使公子負芻與太子留守負芻殺太子而自立子臧見負芻之當主也宣公旣葬子臧將亡國人皆從之負芻立是爲曹成公成公懼告罪且請子臧子臧乃反成

公遂爲君其後晉侯會諸侯執曹成公歸之京師將見子臧於周天子而立之子臧曰前記有之聖達節次守節下不失節爲君非吾節也雖不能聖敢失守乎遂亡奔宋曹人數請晉侯謂子臧反國吾歸爾君於是子臧反國晉乃言天子歸成公於曹子臧遂以國致成公成公爲君子臧不出曹國乃安子臧讓千乘之國可謂賢矣故春秋賢而褒其後

延陵季子者吳王之子也嫡同母昆弟四人長曰過次曰餘祭次曰夷昧次曰札札卽季子最小而賢兄弟皆愛之旣除喪將立季子季子辭曰曹宣公之卒也諸侯與曹人不義曹君將立子臧子臧去之遂不爲也以成曹君君子曰能守節矣君義嗣也誰敢干君有國非吾節也札雖不才願附子臧以無失節固立之棄其室而耕乃舍之過曰今若是作而與季子季子必不受請無與子而與弟弟兄迭爲君而致諸侯

乎季子皆曰諾故諸其爲君者皆輕死爲勇飲食必祝曰天若有吾國必疾有禍予身故過也死餘祭立餘祭死夷昧立夷昧死而國宜之季子也季子使而未還僚者長子之庶兄也自立爲吳王季子使而還至則君事之過之子曰王子光號曰闔閭不悅曰先君之所爲不與子而與弟者凡爲季子也將從先君之命則國宜之季子也如不從先君之命而與子我宜當立者也僚惡得爲君於是使專諸刺僚而致國乎季子季子曰爾殺我君吾授爾國是吾與爾爲亂也爾殺我兄吾又殺爾是父子兄弟相殺終身無已也去而之延陵終身不入吳國故號曰延陵季子君子以其不受國爲義以其不殺爲仁是以春秋賢季子而尊貴之也

延陵季子將西聘晉帶寶劍以過徐君徐君觀劍不言而色欲之延陵季子爲有上國之使未獻也然其心許之矣致使

於晉故反則徐君死於楚於是脫劍致之嗣君從者止之曰  
此吳國之寶非所以贈也延陵季子曰吾非贈之也先日吾  
來徐君觀吾劍不言而其色欲之吾爲有上國之使未獻也  
雖然吾心許之矣今死而不進是欺心也愛劍傷心廉者不  
爲也遂脫劍致之嗣君嗣君曰先君無命孤不敢受劍於是  
季子以劍帶徐君墓樹而去徐人嘉而歌之曰延陵季子兮  
不忘故脫千金之劍兮帶丘墓

許悼公疾瘡飲藥毒而死太子止自責不嘗藥不立其位與  
其弟緯專哭泣啜餈粥嗌不容粒痛已之不嘗藥未逾年而  
死故春秋義之

衛宣公之子伋也壽也朔也伋前母子也壽與朔後母子也  
壽之母與朔謀欲殺太子伋而立壽也使人與伋乘舟於河  
中將沈而殺之壽知不能止也因與之同舟舟人不得殺伋



方乘舟時伋傅母恐其死也閔而作詩二子乘舟之詩是其詩曰二子乘舟汎汎其景願言思子中心養養於是壽閔其兄之且見害作憂思之詩黍離之詩是也其詩曰行邁靡靡中心搖搖知我者謂我心憂不知我者謂我何求悠悠蒼天此何人哉又使伋之齊將使盜見載旌要而殺之壽止伋伋曰棄父之命非子道也不可壽又與之偕行壽之母知不能止也因戒之曰壽無爲前也壽又爲前竊伋旌以先行幾及齊矣盜見而殺之伋至見壽之死痛其代己死涕泣悲哀遂載其屍還至境而自殺兄弟俱死故君子義此二人而傷宣公之聽讒也

魯宣公者魯文公之弟也文公薨文公之子子赤立爲魯侯宣公殺子赤而奪之國立爲魯侯公子肸者宣公之同母弟也宣公殺子赤而肸非之宣公與之祿則曰我足矣何以兄

之食爲哉織屨而食終身不食宣公之食其仁恩厚矣其守節固矣故春秋美而貴之

晉獻公太子之至靈臺虵繞左輪御曰太子下拜吾聞國君之子虵繞左輪者速得國太子遂不行返乎舍御人見太子太子曰吾聞爲人子者盡和順君不行私欲恭嚴承命不逆君安今吾得國是君失安也見國之利而忘君安非子道也聞得國而拜其聲非君欲也廢子道不孝逆君欲不忠而使我行之殆欲吾國之危明也拔劍將死御止之曰夫機祥妖孽天之道也恭嚴承命人之行也拜祥戒孽禮也恭嚴承命不以身恨君孝也今太子見福不拜失禮殺身恨君失孝從僻心棄正行非臣之所聞也太子曰不然我得國君之孽也拜君之孽不可謂禮見機祥而忘君之安國之賊也懷賊心以事君不可謂孝挾僞意以御天下懷賊心以事君邪之大

者也而使我行之是欲國之危明也遂伏劍而死君子曰晉太子徒御使之拜蛇祥猶惡之至於自殺者爲見疑於欲國也已之不欲國以安君亦以明矣爲一愚御過言之故至於身死廢子道絕祭祀不可謂孝可謂遠嫌一節之士也

申包胥者楚人也吳敗楚兵於柏舉遂入郢昭王出亡在隨申包胥不受命而赴於秦乞師曰吳爲無道行封豕長蛇蠶食天下從上國始於楚寡君失社稷越在草莽使下臣告急曰吳夷狄也夷狄之求無厭滅楚則西與君接境若鄰於君疆場之患也遠吳之未定君其圖之若得君之靈存撫楚國世以事君秦伯使辭焉曰寡君聞命矣子其就館將圖而告子對曰寡君越在草莽未獲所休下臣何敢即安倚於庭牆立哭日夜不絕聲水漿不入口七日七夜秦哀公爲賦無衣之詩言兵今出包胥九頓首而坐秦哀公曰楚有臣若此而

亡吾無臣若此吾亡無日矣於是乃出師救楚申包胥以秦師至楚秦大夫子滿子虎帥車五百乘以滿曰吾未知吳道使楚人先與吳人戰而會之大敗吳師吳師既退昭王復國而賞始於包胥包胥曰輔君安國非爲身也救急除害非爲名也功成而受賞非賣勇也君既定又何求焉遂逃賞終身不見君子曰申子之不受命赴秦忠矣七日七夜不絕聲厚矣不受賞不伐矣然賞所以勸善也辭賞亦非常法也

齊崔杼者齊之相也弑莊公止太史無書君弑及賊太史不聽遂書賊曰崔杼弑其君崔子殺之其弟又嗣書之崔子又殺之死者二人其弟又嗣復書之乃舍之南史氏是其族也聞太史盡死執簡以往將復書之聞既書矣乃還君子曰古之良史

齊攻魯求岑鼎魯君載岑鼎往齊侯不信而反之以爲非也

使人告魯君柳下惠以爲是因請受之請魯君請於柳下惠柳下惠對曰君之欲以爲岑鼎也以免國也臣亦有國於此破臣之國以免君之國此臣所難也魯君乃以真岑鼎往柳下惠可謂守信矣非獨存己之國也又存魯君之國信之於人重矣猶輿之輓軌也故孔子曰大輿無輓小輿無軌其何以行之哉此之謂也

宋人有得王者獻諸司城子罕子罕不受獻王者曰以示玉人玉人以爲寶故敢獻之子罕曰我以不貪爲寶爾以玉爲寶若與我者皆喪寶也不若人有其寶故宋國之長者曰子罕非無寶也所寶者異也今以百金與搏黍以示兒子兒子必取搏黍矣以和氏之璧與百金以示鄙人鄙人必取百金矣以和氏之璧與道德之至言以示賢者賢者必取至言矣其知彌精其取彌精其知彌拙其取彌拙子罕之所寶者至

矣

昔者有鮠魚於鄭相者鄭相不受或謂鄭相曰子嗜魚何故不受對曰吾以嗜魚故不受魚受魚失祿無以食魚不受得祿終身食魚

原憲居魯環堵之室茨以生蒿蓬戶甕牖揉桑以爲樞上漏下濕匡坐而弦歌子贛聞之乘肥馬衣輕裘中紺而表素軒車不容巷往見原憲原憲冠葉冠杖藜杖而應門正冠則纓絕衽襟則肘見納屨則踵決子贛曰嘻先生何病也原憲仰而應之曰憲聞之無財之謂貧學而不能行之謂病憲貧也非病也若夫希世而行比周而交學以爲人教以爲己仁義之慝與馬之飾憲不忍爲也子贛逡巡面有愧色不辭而去原憲曳杖拖履行歌商頌而反聲滿天地如出金石天子不得而臣也諸侯不得而友也故養志者忘身身且不愛孰能

累之詩云我心匪石不可轉也我心匪席不可卷也此之謂也

晏子之晉見披裘負芻息於途者以爲君子也使人問焉曰曷爲而至此對曰齊人累之吾名曰越石甫晏子曰嘻遠解左驂以贖之載而與歸至舍不辭而入越石甫怒而請絕晏子使人應之曰嬰未嘗得交也今免于於患吾於子猶未可耶越石甫曰吾聞君子拙乎不知己而信乎知己者吾是以請絕也晏子乃出見之曰向也見客之容而今也見客之意嬰聞察實者不留聲觀行者不幾辭嬰可以辭而無弃乎越石甫曰夫子禮之敢不敬從晏子遂以爲上客俗人之有功則德德則驕晏子有功免人於厄而反拙下之其去俗亦遠矣此全功之道也

子列子窮容貌有飢色客有言於鄭子陽者曰子列子圍冠

蓋有道之士也居君之國而窮君無乃爲不好士乎子陽令  
官遺之粟數十乘子列子出見使者再拜而辭使者去子列  
子入其妻望而拊心曰聞爲有道者妻子皆得佚樂今妻子  
皆有飢色矣君過而遺先生先生又辭豈非命也哉子列子  
笑而謂之曰君非自知我者也以人之言而知我以人之言  
而遺我粟也其罪我也又將以人之言此吾所以不受也且  
受人之養不死其難不義也死其難是死無道之人豈義哉  
其後民果作難殺子陽子列子之見微除不義遠矣且子列  
子內有飢寒之憂猶不苟取見得思義見利思害况其在富  
貴乎故子列子通乎性命之情可謂能守節矣

屈原者名平楚之同姓大夫有博通之知清潔之行懷王用  
之秦欲吞滅諸侯并兼天下屈原爲楚東使於齊以結彊黨  
秦國患之使張儀之楚貨楚貴臣上官大夫靳尚之屬上及



令尹子闞司馬子椒內賂夫人鄭袖共譖屈原屈原遂放於外乃作離騷張儀因使楚絕齊許謝地六百里懷王信左右之姦謀聽張儀之邪說遂絕強齊之大輔楚既絕齊而秦欺以六里懷王大怒舉兵伐秦大戰者數秦兵大敗楚師斬首數萬級秦使人願以漢中地謝懷王不聽願得張儀而甘心焉張儀曰以一儀而易漢中地何愛儀請行遂至楚楚囚之上官大夫之屬共言之王王歸之是時懷王悔不用屈原之策以至於此於是復用屈原屈原使齊還聞張儀已去大爲王言張儀之罪懷王使人追之不及後秦嫁女于楚與懷王歡爲藍田之會屈原以爲秦不可信願勿會羣臣皆以爲可會懷王遂會果見囚拘客死於秦爲天下笑懷王子頃襄王亦知羣臣諂誤懷王不察其罪反聽羣讒之口復放屈原屈原疾闇主亂俗汶汶嘿嘿以是爲非以清爲濁不忍見汗世

將自投於淵漁父止之屈原曰世皆醉我獨醒世皆濁我獨清吾獨聞之新浴者必振衣新沐者必彈冠又惡能以其泠泠更事之嘿嘿者哉吾寧投淵而死遂自投湘水汨羅之中而死

楚昭王有士曰石奢其爲人也公正而好義王使爲理於是廷有殺人者石奢追之則其父也遂反於廷曰殺人者僕之父也以父成政不孝不行君法不忠施罪廢法而伏其辜僕之所守也伏斧鑕命在君君曰追而不及庸有罪乎子其治事矣石奢曰不私其父非孝也不行君法非忠也以死罪生非廉也君赦之上之惠也臣不敢失法下之行也遂不離銜鑕刎頸而死于廷中君子聞之曰貞夫法哉孔子曰子爲父隱父爲子隱直在其中矣詩曰彼己之子邦之司直石子之謂也

晉文公反國李離爲大理過殺不辜自繫曰臣之罪當死文公令之曰官有上下罰有輕重是下吏之罪也非子之過也李離曰臣居官爲長不與下讓位受祿爲多不與下分利過聽殺無辜委下畏死非義也臣之罪當死矣文公曰子必自以爲有罪則寡人亦有過矣李離曰君量能而授官臣奉職而任事臣受印綬之日君命曰必以仁義輔政寧過於生無失於殺臣受命不稱墜惠蔽恩如臣之罪乃當死君何過之有且理有法失生即生失殺即死君以臣爲能聽微決疑故任臣以理今離刻深不顧仁義信文墨不察是非聽他辭不積事實掠服無罪使百姓怨天下聞之必議吾君諸侯聞之必輕吾國怨積於百姓惡揚於天下權輕於諸侯如臣之罪是當重死文公曰吾聞之也直而不枉不可與往方而不圓不可與長存願子以此聽寡人也李離曰君以所私害公法

殺無罪而生當死二者非所以教於國也離不敢受命文公曰子獨不聞管仲之爲人臣耶身辱而君肆行汗而霸成李離曰臣無管仲之賢而有辱汗之名無霸王之功而有射鉤之累夫無能以臨官籍汗以治人君雖不忍加之於法臣亦不敢汗官亂治以生臣聞命矣遂伏劍而死

晉文公反國酌士大夫酒召咎犯而將之召艾陵而相之授田百萬介子推無爵齒而就位觴三行介子推奉觴而起曰有龍矯矯將失其所有虵從之周流天下龍既入深淵得其安所虵脂盡乾獨不得甘雨此何謂也文公曰嘻是寡人之過也吾爲子爵與待旦之朝也吾爲子田與河東陽之間介子推曰推聞君子之道謁而得位道士不居也爭而得財廉士不受也文公曰使我得反國者子也吾將以成子之名介子推曰推聞君子之道爲人子而不能承其父者則不敢當

其後爲人臣而不見察於其君者則不敢立於其朝然推亦無索於天下矣遂去而之介山之上文公使人求之不得爲之避寢三月號呼暮年詩曰逝將去汝適彼樂郊適彼樂郊誰之永號此之謂也文公待之不肯出求之不能得以謂焚其山宜出及焚其山遂不出而焚死

申徒狄非其世將自投於河崔嘉聞而止之曰吾聞聖人仁士之於天地之間民之父母也今爲濡足之故不救溺人可乎申徒狄曰不然昔者桀殺關龍逢紂殺王子比干而亡天下吳殺子胥陳殺洩冶而滅其國故亡國殘家非聖智也不用故也遂負石沈於河君子聞之曰廉矣乎如仁與智吾未見也詩曰天實爲之謂之何哉此之謂也

齊大飢黔敖爲食於路以待餓者而食之有餓者蒙袂接履貿貿然來黔敖左奉食右執飲曰嗟來食餓者揚其目而視

之曰子唯不食嗟來之食以至於此也從而謝焉終不食而死曾子聞之曰微與其嗟也可去其謝也可食

東方有士曰袁族目將有所適而飢於道狐父之盜丘人也見之下壺餐以與之袁族目三鋪而能視仰而問焉曰子誰也曰我狐父之盜丘人也袁族目曰嘻汝乃盜也何爲而食我以吾不食也兩手據地而歐之不出喀喀然遂伏地而死縣名爲勝母曾子不入邑號朝歌墨子回車故孔子席不正不坐割不正不食不飲盜泉之水積正也族目不食而死潔之至也

鮑焦衣弊膚見潔畚將蔬遇子贛於道子贛曰吾子何以至此也焦曰天下之遺德教者衆矣吾何以不至於此也吾聞之世不已知而行之不已者是爽行也上不已知而干之不止者是毀廉也行爽廉毀然且不舍惑於利者也子贛曰吾

聞之非其世者不生其利汙其君者不履其土今吾子汙其君而履其土非其世而將其蔬此誰之有哉鮑焦曰嗚呼吾聞賢者重進而輕退廉者易醜而輕死乃弃其蔬而立槁死於洛水之上君子聞之曰廉夫剛哉夫山銳則不高水狹則不深行特者其德不厚志與天地疑者其爲人不祥鮑子可謂不祥矣其節度淺深適至而止矣詩曰已焉哉天實爲之謂之何哉

公孫杵臼程嬰者晉大夫趙朔客也晉趙穿弒靈公趙盾時爲貴大夫亡不出境還不討賊故春秋責之以盾爲弒君屠岸賈者幸於靈公晉景公時賈爲司寇欲討靈公之賊盾已死欲誅盾之子趙朔徧告諸將曰盾雖不知猶爲首賊賊臣弒君子孫在朝何以懲罪請誅之韓厥曰靈公遇賊趙盾在外吾先君以爲無罪故不誅今諸君將妄誅妄誅謂之亂臣

有大事君不聞是無君也屠岸賈不聽韓厥告趙朔趣亡趙朔不肯曰子必不絕趙祀予死不恨韓厥許諾稱疾不出賈不請而擅與諸將攻趙氏於下宮殺趙朔趙同趙括趙嬰齊皆滅其族趙朔妻成公姊有遺腹走公宮匿公孫杵臼謂程嬰胡不死嬰曰朔之妻有遺腹若幸而男吾奉之即女也吾徐死耳無何而朔妻免生男屠岸賈聞之索於宮朔妻置兒袴中祝曰趙宗滅乎若號即不滅乎若無聲及索兒竟無聲已脫程嬰謂杵臼曰今一索不得後必且復之奈何杵臼曰立孤與死孰難嬰曰立孤亦難耳杵臼曰趙氏先君遇子厚子彊爲其難者吾爲其易者吾請先死而二人謀取他嬰兒負以文櫛匿山中嬰謂諸將曰嬰不肖不能立孤誰能與吾千金吾告趙氏孤處諸將皆喜許之發師隨嬰攻杵臼杵臼曰小人哉程嬰下宮之難不能死與我謀匿趙氏孤兒今又



賣之縱不能立孤兒忍賣之乎抱而呼天乎趙氏孤兒何罪請活之獨殺杵臼也諸將不許遂并殺杵臼與兒諸將以爲趙氏孤兒已死皆喜然趙氏真孤兒乃在程嬰卒與俱匿山中居十五年晉景公病卜之大業之冑者爲祟景公問韓厥韓厥知趙孤存乃曰大業之後在晉絕祀者其趙氏乎夫自中行行皆嬴姓也中行行人面鳥喙降佐帝大戊及周天子皆有明德下及幽厲無道而叔帶去周適晉事先君繆侯至于成公世有立功未嘗絕祀今及吾君獨滅之趙宗國人哀之故見龜筮唯君圖之景公問趙尚有後子孫乎韓厥具以實告景公乃與韓厥謀立趙孤兒召匿之宮中諸將入問病景公因韓厥之衆以脅諸將而見趙孤兒孤兒名武諸將不得已乃曰昔下宮之難屠岸費爲之矯以君命并命羣臣非然孰敢作難微君之病羣臣固將請立趙後今君有命羣臣

願之於是召趙武程嬰徧拜諸將遂俱與程嬰趙氏攻屠岸賈滅其族復與趙氏田邑如故趙武冠爲成人程嬰乃辭大夫謂趙武曰昔下宮之難皆能死我非不能死思立趙氏後今子旣立爲成人趙宗復故我將下報趙孟與公孫杵臼趙武號泣固請曰武願苦筋骨以報子至死而子忍弃我死乎程嬰曰不可彼以我爲能成事故皆先我死今我不下報之是以我事爲不成也遂自殺趙武服衰三年爲祭邑春秋祠之世不絕君子曰程嬰公孫杵臼可謂信交厚士矣嬰之自殺下報亦過矣

吳有士曰張胥鄙譚夫吾前交而後絕張胥鄙有罪拘將死譚夫吾合徒而取之出至於道而後乃知其夫吾也輟行而辭曰義不同於子故前交而後絕吾聞之君子不爲危易行今吾從子是安則肆志危則易行也與吾因子而生不若反

拘而死監閭聞之令吏釋之張胥鄙曰吾義不同於譚夫吾故不受其任矣今吏以是出我以譚夫吾故免也吾庸遽受之乎遂觸牆而死譚夫吾聞之曰我任而不受佞也不知而出之愚也佞不可以接士愚不可以事君吾行虛矣人惡以吾力生吾亦恥以此立於世乃絕頸而死君子曰譚夫吾其以失士矣張胥鄙亦未爲得也可謂剛勇矣未可謂得節也蘇武者故右將軍平陵侯蘇建子也孝武皇帝時以武爲枺中監使匈奴是時匈奴使者數降漢故匈奴亦欲降武以取當單于使貴人故漢人衛律說武武不從乃設以貴爵重祿尊位終不聽於是律絕不與飲食武數日不降又當盛夏以旃厚衣并束三日暴武心意愈堅終不屈撓稱曰臣事君由子事父也子爲父死無所恨守節不移雖有鈇鉞湯鑊之誅而不懼也尊官顯位而不榮也匈奴亦由此重之武留十餘

歲竟不降下可謂守節臣矣詩云我心匪石不可轉也我心匪席不可卷也蘇武之謂也匈奴給言武死其後漢聞武在使使者求武匈奴欲慕義歸武漢尊武以爲典屬國顯異於他臣也

新序卷第七

新序 卷七

新序卷第八

陽朔元年二月癸卯護左都水使者光祿大夫臣劉向上

義勇

陳恆弒簡公而盟盟者皆完其家不盟者殺之石他人曰昔之事其君者皆得其君而事之今謂他人曰舍而君而事我他人不能雖然不盟則殺父母也從而盟是無君臣之禮也生於亂世不得正行劫於暴上不得道義故雖盟不以父母之死不如退而自殺以禮其君乃自殺

陳恆弒君使勇士六人劫子淵棲子淵棲曰子之欲與我以我爲知乎臣弒君非知也以我爲仁乎見利而背君非仁也以我爲勇乎劫我以兵懼而與子非勇也使吾無此三者與何補於子若吾有此三者終不從子矣乃舍之

宋閔公臣長萬以勇力聞萬與魯戰師敗爲魯所獲囚之宮

中數月歸之宋宋閔公博婦人在側公謂萬曰魯君孰與寡人美萬曰魯君美天下諸侯唯魯君耳宜其爲君也閔公矜婦人妒因言曰爾魯之囚虜爾何知萬怒遂搏閔公頰齒落於口絕吭而死仇牧聞君死趨而至遇萬於門攜劍而叱之萬臂擊仇牧而殺之齒著於門闔仇牧可謂不畏彊禦矣趨臣之難顧不旋踵

崔杼弑莊公令士大夫盟者皆脫劍而入言不疾指不至血者死所殺十人次及晏子晏子奉楮血仰天歎曰惡乎崔子將爲無道殺其君盟者皆視之崔杼謂晏子曰子與我我與子分國子不吾與吾將殺子直兵將推之曲兵將勾之唯子圖之晏子曰嬰聞回以利而背其君者非仁也劫以刃而失其志者非勇也詩云愷悌君子求福不回嬰可謂不回矣直兵推之曲兵勾之嬰不之回也崔子舍之晏子趨出授綏而

垂其僕將馳晏子拊其手曰虎豹在山林其命在庖厨馳不益生緩不益死按之成節然後去之詩云彼己之子舍命不渝晏子之謂也

佛肸以中牟叛置鼎於庭致士大夫曰與我者受邑不吾與

者烹大夫皆從之至於田卑田卑中牟之邑人也曰義死不避斧鉞之罪

義窮不受軒冕之服無義而生不仁而富不如烹褻衣將就

鼎佛肸脫屣而生之趙氏聞其叛也攻而取之聞田卑不肯

與也求而賞之田卑曰不可也一人舉而萬夫俛首智者不

爲也賞一人以慙萬夫義者不取也我受賞使中牟之士懷

恥不義辭賞從處曰以行臨人之道吾去矣遂南之楚

楚太子建以費無極之譖見逐建有子曰勝在外子西召勝

使治白號曰白公子西太子建之弟勝之叔也勝怨楚逐其父將弑惠王及子西

惠王亦子西之姪王之叔也欲得易甲人性名陳士勒兵以示易甲曰與我無患不富



貴不吾與則此是也易甲笑曰嘗言吾義矣吾子忘之乎立  
得天下不義吾不取也威吾以兵不義吾不從也今子將弑  
子之君而使我從子非吾前義也子雖告我以利威我以兵  
吾不忍爲也子行子之威則吾亦得明吾義也逆子以兵爭  
也應子以聲鄙也吾聞士立義不爭行死不鄙拱而待兵顏  
色不變也

白公勝將弑楚惠王王出亡令尹司馬皆死拔劍而屬之於  
屈廬曰子與我將舍子子不與我必殺子廬曰子殺叔父而  
求福於廬也可乎吾聞知命之士見利不動臨死不恐爲人  
臣者時生則生時死則死是謂人臣之禮故上知天命下知  
臣道其有可劫乎子胡不推之白公勝乃內其劍

白公勝既殺令尹司馬欲立王子閻以爲王王子閻不肯劫  
之以刃三子閻曰王孫輔相楚國匡正王室而后自庇焉閻

之願也今子假威以暴王室殺伐以亂國家吾雖死不子從也白公勝曰楚國之重天下無有天以與子子何不受也王子閻曰吾聞辭天下者非輕其利也以明其德也不爲諸侯者非惡其位也以繫其行也今吾見國而忘主不仁也劫白刃而失義不勇也子雖告我以利威我以兵吾不爲也白公彊之不可遂殺之葉公高率衆誅白公而反惠王於國

白公之難楚人有莊善者辭其母將往死之其母曰棄其親而死其君可謂義乎莊善曰吾聞事君者內其祿而外其身今所以養母者君之祿也身安得無死乎遂辭而行比至公門三廢車中其僕曰子懼矣曰懼旣懼何不返莊善曰懼者吾私也死義吾公也聞君子不以私害公及公門刎頸而死君子曰好義乎哉

齊崔杼弑莊公也有陳不占者聞君難將赴之比去餐則失

匕上車失軾御者曰怯如是去有益乎不占曰死君義也無勇私也不以私害公遂往聞戰鬥之聲恐駭而死人曰不占可謂仁者之勇也

知伯囂之時有士曰長兒子魚絕知伯而去之三年將東之越而道聞知伯囂之見殺也謂御曰還車反吾將死之御曰夫子絕知伯而去之三年矣今反死之是絕屬無別也長兒子魚曰不然吾聞仁者無餘愛忠臣無餘祿吾聞知伯之死而動吾心餘祿之加於我者至今尚存吾將往依之反而死衛懿公有臣曰弘演遠使未還狄人攻衛其民曰君之所與祿位者鶴也所富者宮人也召使宮人與鶴戰余焉能戰遂潰而去狄人追及懿公於榮澤殺之盡食其肉獨舍其肝弘演至報使於肝畢呼天而號盡哀而止曰臣請為表因自刺其腹內懿公之肝而死齊桓公聞之曰衛之亡也以無道今

有臣若此不可不存於是救衛於楚丘

羊尹文者荆之歐鹿毘者也司馬子期獵於雲夢載旗之長  
拖地羊尹文拔劍齊諸軫而斷之貳車抽弓於韋援矢於箭  
引而未發也司馬子期伏軾而問曰吾有罪於夫子乎對曰  
臣以君旗拽地故也國君之旗齊於軫大夫之旗齊於軾今  
子荆國有名大夫而滅三等文之斷也不亦可乎子期悅載  
之王所王曰吾聞有斷子之旗者其人安在吾將殺之子期  
以文之言告王悅使文爲江南令而大治

卞莊子好勇養母戰而三北交遊非之國君辱之及母死三  
年冬與魯戰卞莊子請從見於魯將軍曰初與母處是以三  
北今母死請塞責而神有所歸遂赴敵獲一甲首而獻之曰  
此塞一北又入獲一甲首而獻之曰此塞再北又入獲一甲  
首而獻之曰此塞三北將軍曰母沒爾家宜止之請爲兄弟

莊子曰三北以養母也是子道也今士節小具而塞責矣吾聞之節士不以辱生遂返敵殺十人而死君子曰三北又塞責滅世斷家於孝不終也

新序卷第九

陽朔元年二月癸卯護左都水使者光祿大夫臣劉向上

善謀

齊桓公時江國黃國小國也在江淮之間近楚楚大國也數  
侵伐欲滅取之江人黃人患楚齊桓公方存亡繼絕救危扶  
傾尊周室攘夷狄爲陽穀之會貫澤之盟與諸侯將伐楚江  
人黃人慕桓公之義來會盟於貫澤管仲曰江黃遠齊而近  
楚楚爲利之國也若伐而不能救無以宗諸侯不可受也桓  
公不聽遂與之盟管仲死楚人伐江滅黃桓公不能救君子  
閔之是後桓公信壞德衰諸侯不附遂陵遲不能復興夫仁  
智之謀即事有漸力所不能救未可以受其質桓公受之過  
也管仲可謂善謀矣詩云曾是莫聽大命以傾此之謂也  
晉文公之時周襄王有弟太叔之難出亡居於鄭不得入使

告難于魯于晉于秦其明年春秦伯師于河上將納王狐偃言於晉文公曰求諸侯莫如勤王且大義也諸侯信之繼文之業而信宣於諸侯今爲可矣卜偃卜之曰吉遇黃帝戰於阪泉之兆公曰吾不堪也對曰周禮未改今之王古之帝也公曰筮之筮之遇大有之睽曰吉遇公用享于天子之卦戰克而王享吉孰大焉且是卦也天爲澤以當日天子降心以迎公不亦可乎大有去睽而復亦其所也晉侯辭秦師而下三月甲辰次于陽樊右師圍温左師逆王夏四月丁巳王入于王城取太叔于温而殺之于隰城戊午晉侯朝王王享醴命之侑子之陽樊温原攢茅之田晉於是始開南陽之地其後三年文公遂再會諸侯以朝天子天子錫之弓矢鉅鬯以爲方伯晉文公之命是也卒成霸道狐偃之謀也夫秦魯皆疑晉有狐偃之善謀以成霸功故謀得於帷幄則功施於天

下狐偃之謂也

虞虢皆小國也。虞有夏陽之阻塞，虞虢共守之，晉不能禽也。故晉獻公欲伐虞虢，荀息曰：「君胡不以屈產之乘與垂棘之璧假道於虞？」公曰：「此晉國之寶也，彼受吾璧，不借吾道，則如之何？」荀息曰：「此小之所以事大國也，彼不借吾道，必不敢受吾幣，受吾幣而借吾道，則是我取之中府，置之外府，取之中廢，置之外廢。」公曰：「宮之奇存焉，必不使受也。」荀息曰：「宮之奇知固知矣，雖然，其爲人也通心而懦，又少長於君，通心則其言之略，懦則不能強諫，少長於君則君輕之，且夫玩好在耳目之前，而患在一國之後，中知以上乃能慮之，臣料虞君中知之下也。」公遂借道而伐虢，宮之奇諫曰：「晉之使者其幣重，其辭卑，必不便於虞。」語曰：「唇亡則齒寒矣。」故虞虢之相救，非相爲賜也。今日亡虢而明日亡虞矣。公不聽，遂受其幣而借



之道旋歸四年反取虞荀息牽馬抱璧而前曰臣之謀如何獻公曰璧則猶是而吾馬之齒加長矣晉獻公用荀息之謀而禽虞虞不用宮之奇謀而亡故荀息非霸王之佐戰國兼并之臣也若宮之奇則可謂忠臣之謀也

晉文公秦穆公共圍鄭以其無禮而附於楚鄭大夫佚之狐言於鄭君曰若使燭之武見秦君圍必解鄭君從之召燭之武使之辭曰臣之壯也猶不如人今老矣無能爲也鄭君曰吾不能蚤用子今急而求子是寡人之過也然鄭亡子亦有利不利焉燭之武許諾夜出見秦君曰秦晉圍鄭鄭知亡矣若亡而有益於君敢以煩執事鄭在晉之東秦在晉之西越晉而取鄭君知其難也焉用亡鄭以陪晉晉秦之鄰也鄰之強君之憂也若舍鄭以爲東道主行李之往來共其資糧亦無所害且若立晉君晉君許君焦瑕朝得入而夕設版而畫界

焉君之所知也夫晉何厭之有既東取鄭又欲廣其西境不  
闕秦將焉取之闕秦而利晉願君圖之秦伯說引兵而還晉  
咎犯請擊之文公曰不可微夫人之力不能弊鄭因人之力  
以弊之不仁失其所與不知以亂易整不武吾其還矣亦去  
鄭圍遂解燭之武可謂善謀一言存鄭而安秦鄭君不蚤用  
善謀所以削國也困而覺焉所以得存

楚靈王即位欲爲霸會諸侯使椒舉如晉求諸侯椒舉致命  
曰寡君使舉曰君有惠賜盟于宋曰晉楚之從交相見也以  
歲之不易寡人願結驪於二三君使舉請間君若苟無四方  
之虞則願假寵以請於諸侯晉君欲勿許司馬侯曰不可楚  
王方侈天其或者欲盈其心以厚其毒而降之罰未可知也  
其使能終亦未可知也唯天所相不可與爭君其許之修德  
以待其歸若歸於德吾猶將事之況諸侯乎若適淫虐楚將

棄之吾誰與爭公曰晉有三不殆其何敵之有國險而多馬  
齊楚多難有是三者何嚮而不濟對曰恃馬與險而虞鄰之  
難是三殆也四嶽三塗陽城大室荆山終南九州之險也是  
不一姓冀之北土馬之所生也無興國焉恃險與馬不足以  
爲固也從古以然是以先王務德音以享神人不聞其務險  
與馬也或多難以固其國開其疆土或無難以喪其國失其  
守宇若何虞難齊有仲孫之難而獲桓公至今賴之晉有里  
克之難而獲文公是以爲盟主衛邢無難狄亦喪之故人之  
難不可虞也恃此三者而不修政德亡於不暇有何能濟君  
其許之紂作淫虐文王惠和殷是以實周是以興夫豈爭諸  
侯哉乃許楚靈王遂爲申之會與諸侯伐吳起章華之臺爲  
乾谿之役百姓罷勞怨對於下羣臣倍畔於上公子弃疾作  
亂靈王亡逃卒死於野故曰晉不頓一戰而楚人自亡司馬

侯之謀也

楚平王殺伍子胥之父子胥出亡挾弓而干闔閭大之甚勇之爲是而欲興師伐楚子胥諫曰不可臣聞之君子不爲匹夫興師且事君猶事父也虧君之義復父之讎臣不爲也於是止蔡昭公朝於楚有美裘楚令尹囊瓦求之昭公不予於是拘昭公於郢數年而后歸之昭公濟漢水沈璧曰諸侯有伐楚者寡人請爲前列楚人聞之怒於是興師伐蔡蔡請救于吳子胥諫曰蔡非有罪也楚人無道也君若有憂中國之心則若此時可矣於是興師伐楚遂敗楚人於柏舉而成霸道子胥之謀也故春秋美而褒之

秦孝公欲用衛鞅之言更爲嚴刑峻法易古三代之制度恐大臣不從於是召衛鞅甘龍杜摯三大夫御於君慮世事之變計正法之本使民之道君曰代位不亡社稷君之道也錯

法務明主長臣之行也今吾欲更法以教民吾恐天下之議我也公孫鞅曰臣聞疑行無名疑事無功君亟定變法之慮行之無疑殆無顧天下之議且夫有高人之行者固負非於世有獨知之慮者必見警於民語曰愚者暗成事知者見未萌民不可與慮始可與樂成功郭偃之法曰論至德者不和於俗成大功者不謀於衆法者所以愛民也禮者所以便事也是以聖人苟可以治國不法其故苟可以利民不循其禮孝公曰善甘龍曰不然臣聞聖人不易民而教知者不變法而治因民而教者不勞而功成據法而治者吏習而民安之今君變法不循故更禮以教民臣恐天下之議君願君熟慮之公孫鞅曰予之所言者世俗之所知也常人安於所習學者溺於所聞此兩者所以居官而守法也非所與論於典法之外也三代不同道而王五霸不同法而霸知者作法而愚

者制焉賢者更禮不肖者拘焉更禮之人不足與言事制法  
之人不足與論治君無疑矣杜摯曰利不百不變法功不什  
不易器兩聞之法古無過循禮無邪君其圖之公孫鞅曰前  
世不同教何古之法帝王者不相復何禮之循伏羲神農教  
而不誅黃帝堯舜誅而不怒及至文武各當其時而立法因  
事而制禮禮法兩定制令各宜甲兵器備各便其用臣故曰  
治世不一道便國不必古故湯武之王也不循古殷夏之滅  
也不易禮然則反古者未可非也循禮者未足多也君無疑  
矣孝公曰善吾聞窮鄉多怪曲學多辯愚者之笑知者哀焉  
狂夫之樂賢者憂焉拘世之議人心不疑矣於是孝公違龍  
擊之善謀遂從衛鞅之過言法嚴而酷刑深而必守之以公  
當時取彊遂封鞅爲商君及孝公死國人怨商君至於車裂  
之其患流漸至始皇亦衣塞路羣盜滿山卒以亂亡削刻無

恩之所致也三代積德而王齊桓繼絕而霸秦項嚴暴而亡漢王垂仁而帝故仁恩謀之本也

秦惠王時蜀亂國人相攻擊告急於秦惠王欲發兵伐蜀以爲道險峽難至而韓人來侵秦秦惠王欲先伐韓恐蜀亂先伐蜀恐韓襲秦之弊猶與未決司馬錯與張子爭論於惠王之前司馬錯以伐蜀張子曰不如伐韓王曰請聞其說對曰親衛善楚下兵三川塞什谷之口當屯留之道魏絕南陽楚臨南鄭秦攻新城宜陽以臨二周之郊誅周王之罪侵楚韓之地周自知不救九鼎寶器必出據九鼎按圖籍挾天子以令於天下天下莫敢不聽此王業也今夫蜀西僻之國而戎狄之偷也弊兵勞衆不足以成名得其地不足以爲利臣聞爭名者於朝爭利者於市今三川周室天下之朝市也而王不爭焉顧爭於戎狄去王遠矣司馬錯曰不然臣聞之欲富

者務廣其地欲彊者務富其民欲王者務博其德三資者備而王隨之矣今王地小民貧故臣願先從事於易夫蜀西僻之國而戎狄之長也有桀紂之亂以秦攻之譬如豺狼逐羣羊也得其地足以廣國取其財足以富民繕兵不傷衆而服焉服一國而天下不以爲暴利盡西海而諸侯不以爲貪是我一舉而名實附也又有禁暴正亂之名今攻韓劫天子惡名也而未必利也有不義之名而攻天下所不欲危矣臣請謁其故周天下之宗室也齊韓之與國也周自知失九鼎韓自知亡三川將二國併力合謀以因乎齊趙而求解乎楚魏以鼎予楚以地予魏以鼎予楚以地予魏王不能止此臣所謂危也不如伐蜀完秦惠王曰善寡人請聽子卒起兵伐蜀十月取之遂定蜀蜀王更號爲侯而使陳叔相蜀蜀旣屬秦秦日益彊富厚而制諸侯司馬錯之謀也



楚使黃歇於秦秦昭王使白起攻韓魏韓魏服事秦昭王方  
令白起與韓魏共伐楚黃歇適至聞其計是時秦已使白起  
攻楚取數縣楚頃襄王東徙黃歇上書於秦昭王欲使秦遠  
交楚而攻韓魏以解楚其書曰天下莫強於秦楚今聞王欲  
伐楚此猶兩虎相與鬪兩虎相與鬪而鴛犬受其弊也不如  
善楚臣請言其說臣聞之物至則反冬夏是也致高則危累  
碁是也今大國之地徧天下有其二垂此從生民以來萬乘  
之地未嘗有也今王使盛橋守事於韓盛橋以其地入秦是  
王不用甲不信威而得百里之地也王可謂能矣王又舉甲  
而攻魏杜大梁之門舉河內拔燕酸棗虛桃仁邢魏之兵雲  
翔而不敢救王之功亦多矣王休甲息衆二年而復之有取  
滿史作蒲衍首垣以臨仁平丘黃濟陽甄史作嬰城而魏氏服王又割  
濮歷史作磨之北注之秦齊之要絕楚趙之脊天下五合六聚而

不敢相救王之威亦單矣王若能持功守威挾戰功之心而肥仁義之地使無後患三王不足四五霸不足六也王若負人徒之衆兵革之彊乘毀魏之威而欲以力臣天下之主臣恐其有後患也詩云靡不有初鮮克有終易曰狐涉水濡其尾此言始之易終之難也何以知其然也智伯見伐趙之利不知榆次之禍吳見伐齊之便而不知千隧之敗此二國者非無大功也沒利於前而易患於後也吳之親越也從而伐齊既勝齊人於艾陵爲越人所禽於三渚之浦知伯之信韓魏也從而伐趙攻晉陽之城勝有日矣韓魏畔之殺知伯瑤於叢臺之上今王妬楚之不毀也而忘毀楚之強韓魏也臣爲王慮而不取也詩曰大武遠宅而不涉從此觀之楚國援也鄰國敵也詩曰躍躍毚兔遇犬獲之他人有心予忖度之今王中道而信韓魏之善王也此吳之親越也臣聞之敵不

可假時不可失臣恐韓魏卑辭除患而實欺大國也何則王  
無重世之德於韓魏而有累世之怨焉夫韓魏父子兄弟接  
踵而死于秦者將十世矣本國殘社稷壞宗廟隳剝腹絕腸  
折穎摺頸身首分離暴骨草澤頭顱僵仆相望于境係臣束  
子爲羣虐者相及於路鬼神潢洋無所食民不聊生族類離  
散流亡爲僕妾者盈海渚矣故韓魏之不亡秦社稷之憂也  
今王齎之與攻楚不亦過乎且王攻楚將惡出兵王將藉路  
於仇讎之韓魏乎兵出之日而王憂其不反也是王以兵資  
於仇讎之韓魏也王若不藉路於仇讎之韓魏必攻隨水右  
壤隨水右壤此皆廣川大水山林谿谷不食之地也王雖有  
之不爲得地是王有毀楚之名而無得地之實也且王攻楚  
之日四國必悉起兵以應王秦楚之兵構而不難韓魏氏將  
出兵而攻留方與銍胡陵碭蕭相故宋必盡齊人南面

文作南  
面攻楚

泗北必舉此皆平原四達膏腴之地也而使獨攻王破楚以肥韓魏於中國而勁齊韓魏之彊足以枝於秦齊南以泗水爲境東負海北倚河而無後患天下之國莫彊於齊魏齊魏得地保利而詳事下吏一年之後爲帝未能其於禁王之爲帝有餘矣夫以王壤土之博人徒之衆兵革之彊一舉事而樹怨於楚出令韓魏歸帝重齊是王失計也臣爲王慮莫若善楚秦楚合爲一而以臨韓韓必拱手王施之以山東之險帶以曲河之利韓必爲關內之侯若是而王以十萬伐鄭梁人寒心許臨陵嬰城而上蔡召陵不往來也如此而魏亦關內侯矣王一善楚而關內兩萬乘之主注入地於齊齊右壤可拱手而取也王之經地一極文作兩海要約天下是燕趙無齊楚齊楚無燕趙然後危動燕趙直搖齊楚此四國者不待痛而服也昭王曰善於是乃止白起謝韓魏發使賂楚約爲與

國黃歇受約歸楚解弱楚之禍全彊秦之兵黃歇之謀也  
秦趙戰於長平趙不勝亡一都尉趙王召樓昌與虞卿曰軍  
戰不勝尉係死寡人將束甲而赴之樓昌曰無益也不如發  
重寶使而爲構虞卿曰昌言構者以爲不構軍必破也而制  
構者在秦且王之論秦也欲破王之軍乎不耶王曰秦不遺  
餘力矣必且破趙軍虞卿曰王聽臣發使出重寶以附楚魏  
楚魏欲王之重寶必內吾使吾使入楚魏秦必疑天下恐天  
下之合從必一心如此則構乃可爲也趙王不聽與平陽君  
爲構發鄭朱入秦秦內之趙王召虞卿曰寡人使平陽君爲  
構秦秦已內鄭朱矣虞卿以爲如何對曰王不得構軍必破  
矣天下之賀戰勝者皆在秦鄭朱貴人也而入秦秦王與應  
侯必顯重以示天下楚魏以趙爲構必不救王則構不可得  
也應侯果顯鄭朱以示天下賀戰勝者終不肯構長平大敗

遂圍邯鄲爲天下笑不從虞卿之謀也秦既解圍邯鄲而趙王入朝使趙郝約事於秦割六縣而構虞卿謂趙王曰秦之攻王也倦而歸乎亡其力尚能進之愛王而不攻乎王曰秦之攻我也不遺餘力矣必以倦歸也虞卿曰秦以其力攻其所不能取倦而歸王又攻其力之所不能取以送之是助秦自攻也來年秦復攻王王無救矣王以虞卿之言告趙郝曰虞卿能量秦力之所至乎誠知秦力之所不進此彈丸之地不與令秦來年復攻於王王得無割其內而構乎王曰請聽子割矣子能必來年秦之不復攻乎趙郝曰此非臣所敢任也他日三晉之交於秦相若也今秦善韓魏而攻王王之所以事秦者必不如韓魏也今臣之爲足下解負親之攻開關通弊齊交韓魏至來年而獨取攻於秦王之所以事秦必在韓魏之後也此非臣之所敢任也王以告虞卿虞卿對曰郝

言不構來年秦復攻王王得無復割其內而構乎今構郝又不能必秦之不復攻也雖割何益來年復攻又割其力之所不能取以構此自盡之術也不如無構秦雖善攻不能取六縣趙雖不能守亦不失六城秦倦而歸兵必疲我以五縣收天下以攻罷秦是我失之於天下而取償於秦也吾國尚利孰與坐而割地自弱以彊秦今郝曰秦善韓魏而攻趙者必王之事秦不如韓魏也是使王歲以六城事秦也坐而地盡來年秦復來割王將與之乎不與是弃前功而挑秦禍也與之即無地而給之語曰彊者善攻而弱者不能守今坐而聽秦秦兵不弊而多得地是彊秦而弱趙也以益彊之秦而割愈弱之趙其計固不止矣且王之地有盡而秦之求無已以有盡之地給無已之求其勢必無趙矣計未定樓緩從秦來趙王與樓緩計之曰與秦地與無與孰吉緩辭讓曰此非臣

之所能知也王曰雖然試言公之私樓緩對曰亦聞夫公父  
文伯母乎公父文伯仕於魯病死女子爲自殺於房中者二  
人其母聞之不肯哭也其相室曰焉有子死而不哭者乎其  
母曰孔子賢人也逐於魯而是人不隨也今死而婦人爲自  
殺者二人若是者必其於長者薄而於婦人厚也故從母言  
是爲賢母從妻言是必不免爲妒婦故其言一也言者異則  
人心變矣今臣新從秦來而言勿與則非計也言與之恐王  
以臣爲秦也故不敢對使臣得爲大王計不必與之王曰諾  
虞卿聞之曰此飾說也王慎勿與樓緩聞之往見王王又以  
虞卿之言告樓緩樓緩對曰不然虞卿得其一不得其二夫  
秦趙構難而天下皆說何也曰吾且因彊而乘弱矣今趙兵  
困於秦天下之賀戰勝者必盡在於秦矣故不如亟割地爲  
和以疑天下而慰秦之心不然天下將因秦之怒乘趙之弊



而不分之趙見亡何秦之圖乎故曰虞卿得其一不得其二願王以此決之勿復計也虞卿聞之往見王曰危哉樓子之所以爲秦者是愈疑天下而何慰秦之心哉獨不言示天下弱乎且臣言勿與非固勿與而已也秦索六城於王而王以六城賂齊齊秦之深讎也得王之六城并力而西擊秦齊之聽王不待辭之畢也則是王失之於齊而取償於秦也而齊趙之讎可以報矣而示天下有能爲也王以此爲發聲兵未窺於境臣見秦之重賂而反構於王也從秦爲構韓魏聞之必盡重王重王必出重寶以先於王則是王一舉而結三國之親而與秦易道也趙王曰善即發虞卿東見齊王與之謀秦虞卿之謀行而趙霸此存亡之樞機樞機之發間不及旋踵是故虞卿一言而秦之震懼趨風馳指而請備故善謀之臣其於國豈不重哉微虞卿趙以亡矣

魏請爲從趙孝成王召虞卿謀過平原君平原君曰願卿之  
論從也虞卿入見王曰魏請爲從對曰魏過王曰寡人固未  
之許對曰王過王曰魏請從卿曰魏過寡人未之許又曰寡  
人過然則從終不可耶對曰臣聞小國之與大國從事也有  
利大國受福有敗小國受禍今魏以小請其禍而王以大辭  
其福臣故曰王過魏亦過竊以爲從便王曰善乃合魏爲從  
使虞卿久用於趙趙必霸會虞卿以魏齊之事弃捐相印而  
歸不用趙旋亡

新序卷第九

新序 卷九

新序卷第十

陽朔元年二月癸卯護左都水使者光祿大夫臣劉向上

善謀下

沛公與項籍俱受令於楚懷王曰先入咸陽者王之沛公將

從武關入至南陽守戰南陽守齧保宛城

一作南陽守戰擊秦破之南陽守齧是保城守危

堅守

不下沛公引兵圍宛三匝南陽守欲自殺其舍人陳恢止之

曰死未晚也於是恢乃踰城見沛公曰臣聞足下約先入咸

陽者王之今足下留兵盡日圍宛宛大郡之都也連城數十

人民衆蓄積多其吏民自以爲降而死故皆堅守乘城足下

攻之死傷者必多死者未收傷者未瘳足下曠日則事留引

兵而去宛完繕弊甲砥礪涸兵而隨足下之後足下前則失

咸陽之約後有彊宛之患竊爲足下危之爲足下計者莫如

約宛守降封之因使止守引其甲兵與之西擊諸城未下者

聞風爭開門而待足下通行無所累沛公曰善乃以宛守爲  
殷侯封陳恢千戶引兵西無不下者遂先入咸陽陳恢之謀  
也

漢王旣用滕公蕭何之言擢拜韓信爲上將軍引信上坐王  
問曰丞相數言將軍將軍何以教寡人計策信謝因問王曰

今東向爭權天下豈非項王耶曰然大王自斷文作料勇著仁疆

孰與項王漢王默然良久曰不如也信爲拜賀曰唯信亦以

爲大王不如也然臣嘗事楚請言項王再人項王喑噁叱咤

千人皆廢然不能任屬賢將此匹夫之勇耳項王見人恭謹

言語响响人疾病涕泣分飲食至使人有功當封爵印利綬

弊忍不能與此所謂婦人之仁項王雖霸天下而臣諸侯不

居關中都彭城又背義帝約而以親愛王諸侯不平諸侯之

見項王遷逐義帝江南亦皆歸逐其主自王善地項王所過

無不殘滅多怨百姓不附特劫於威彊服耳名雖爲霸王實失天下心故曰其彊易弱今大王誠反其道任天下武勇何不誅以天下城邑封功臣何不服以義兵從思東歸之士何不散且三秦王爲秦將秦子弟數歲所殺亡不可勝計又欺其衆降諸侯至新安項王詐坑秦降卒二十餘萬人唯獨邯欣鄴脫秦父兄怨此三人痛入骨髓今楚彊以威王此三人秦民莫愛大王之入武關秋毫無所害除秦苛法與秦約法三章且秦民無不欲得大王王秦者於諸侯約大王當王關中民戶知之大王失職之蜀民無不恨者今大王舉而東三秦可傳檄而定也於是漢王喜自以爲得信晚遂聽信計部署諸將所擊八月漢王東出秦民歸漢王遂誅三秦王定其地收諸侯兵討項王定帝業韓信之謀也

趙地亂武臣張耳陳餘定趙地立武臣爲趙王張耳爲相陳

餘爲將軍趙王間出爲燕軍所得燕囚之欲與三分其地乃歸王使者至燕輒殺之以固求地張耳陳餘患之有斲養卒謝其舍中入曰吾爲公說燕與趙王載歸舍中人皆笑之曰使者往十輩死若何以能得王斲養卒曰非若所知乃洗沐往見張耳陳餘遣行見燕王燕王問之對曰賤人希見長者願請一卮酒已飲又問之復曰賤人希見長者願復請一卮酒與之酒卒曰王知臣何欲燕王曰欲得而王爾卒曰君知張耳陳餘何人也燕王曰賢人也曰君知其意何欲曰欲得其王耳趙卒笑曰君未知兩入所欲也夫武臣張耳陳餘杖馬策下趙數十城此亦各欲南面而王豈爲卿相哉夫臣與主豈可同日道哉願其勢始定未敢三分而王且以少長先立武臣爲王以持趙心今趙地已服此兩人亦欲分趙而王時未可爾今君囚趙王此兩人名爲求趙王實欲燕殺之此

兩人分趙自立夫以一趙尚易燕沉兩賢王左提右挈執直義而以責不直之弱燕滅無日矣燕王以爲然乃遣趙王養卒爲御而歸遂得反國復立爲王趙卒之謀也

酈食其號酈生說漢王臣聞之知天之天者王事可成不知天之天者王事不可成王者以民爲天而民以食爲天夫教倉天下轉輸久矣臣聞其下乃有藏粟甚多楚人拔滎陽不堅守教倉乃引而東令譎過卒分守成臯此乃天所以資漢方今楚易取而漢反却自奪其便臣竊以爲過矣且兩雄不俱立楚漢久相持不決百姓騷動海內搖蕩農夫釋耒工女下機天下之心未有所定也願陛下急復進兵收取滎陽據教倉之粟塞成臯之險杜太行之路距蜚狐之口守白馬之津以示諸侯形制之勢則天下知所歸矣漢王曰善乃從其計畫復守教倉卒糧食不盡以擒項氏其後吳楚反將軍竇



嬰周亞夫復據教倉塞成阜如前以破吳楚皆酈生之謀也  
酈生說漢王曰方今燕趙已復唯齊未下今田橫據千里之  
齊田間據二十萬之軍於歷城諸田宗彊負海阻河濟南近  
楚民多變詐陛下雖遣數十萬師未可以歲月下也臣請奉  
明詔說齊王令稱東藩於是使酈生食其說齊王曰王知天  
下之所歸乎王曰不知也曰王知天下之所歸則齊國可得  
而有也若不知天下所歸則齊國未可保也齊王曰天下何  
歸曰歸漢王曰先生何以言之曰漢王與項王戮力西面擊  
秦約先入咸陽者王之漢王先入咸陽項王倍約不與而王  
漢中項王遷殺義帝漢王起蜀漢之兵擊三秦出關而責義  
帝之處收天下之兵立諸侯之後降城即以侯其將得賂即  
以予其士與天下同其利豪桀賢才皆樂爲其用諸侯之兵  
四面而至蜀漢之粟方船而下項王有倍約之名殺義帝之

實於人之功無所記於人之過無所忘戰勝而不得其賞拔  
城而不得其封非項氏莫得用事爲人刻印利而不能授攻  
城得賂積財而不能賞天下畔之賢才怨之而莫爲之用故  
天下之事歸於漢王可坐而策也夫漢王發蜀漢定三秦涉  
西河之外乘上黨之兵下井陘誅成安破北魏舉三十二城  
此蚩尤之兵非人之力也今已據敖倉之粟塞成皋之險守  
白馬之津杜太行之阪距飛狐之口天下後服者先亡矣王  
疾下漢王齊國社稷可得而保也不下漢王危亡可立而待  
也田橫以爲然即聽酈生罷歷下兵戰守之備與酈生日縱  
酒此酈生之謀也及齊人蒯通說韓信曰足下受詔擊齊何  
故止將三軍之衆不如一豎儒之功可因齊無備擊之韓信  
從之酈生爲田橫所害後信通亦不得其所由不仁也  
漢三年項羽急圍漢王滎陽漢王恐憂與酈生謀撓楚權酈

生曰昔湯伐桀封其後於杞武王伐紂封其後於宋今秦無德弃義侵伐諸侯社稷滅六國之後使無立錐之地陛下誠復立六國後事已授印此君臣百姓必皆戴陛下德莫不嚮風慕義願爲臣妾德義已行陛下南嚮稱霸楚必歛衽而朝漢王曰善趣刻印先生因行佩之矣酈先生未行張良從外求謁漢王方食曰子房前客有爲我計撓楚權者具以食其言告之曰其於子房意如何良曰誰爲陛下畫此計者陛下事去矣漢王曰何哉良對曰臣請借前箸而籌之曰昔湯伐桀而封其後於杞者斯能制桀之死命也陛下能制項籍之死命乎曰未能也其不可一也武王伐紂而封其後於宋者斯能得紂之頭也今陛下能得項籍之頭乎曰未能也其不可二矣武王入殷表商容之間軾箕子之門封比干之墓今陛下能封聖人之墓表賢人之閭軾智者之門乎曰未能也

其不可三矣發鉅橋之粟散鹿臺之錢以賜貧羸今陛下能  
散府庫以賜貧羸乎曰未能也其不可四矣殷事已畢偃革  
爲軒倒載干戈以示天下不復用兵今陛下能偃革倒載干  
戈乎曰未能也其不可五也休馬於華山之陽以示無所用  
今陛下能休馬無所用乎曰未能也其不可六矣休牛於桃  
林史作放牛桃林之陰  
示天下不復輸糧以示不復輸糧今陛下能休牛不復輸糧乎曰  
未能也其不可七矣且夫天下游士捐其親戚棄墳墓去故  
舊從陛下游者皆日夜望尺寸之地今復立韓魏燕趙齊楚  
之後其王皆復立游士各歸事其主從其親戚反其故舊墳  
墓陛下誰與取天下乎其不可八也且夫楚雖無彊六國復  
撓而從之陛下焉得而臣之乎誠用客之計陛下之事去矣  
漢王輟食吐哺罵曰豎儒幾敗乃公事今趣銷印止不使遂  
并天下之兵誅項籍定海內張子房之謀也楚雖無彊漢史  
作楚唯無彊

漢五年追擊項王陽夏南止軍與淮陰侯韓信建成侯彭越期會而擊楚軍至固陵不會楚擊漢軍大破之漢王復入壁深塹而守之謂張子房曰諸侯不從約奈何對曰楚兵且破而未有分地其不至固宜君王能與共天下今可立致也則不能事未可知也君王能自陳以東傅海盡與韓信睢陽以北至穀城盡與彭越使各自爲戰則楚易敗也漢王乃使使者告韓信彭越曰并力擊楚楚已破自陳以東傅海與齊王睢陽以北至穀城與彭相國使者至韓信彭越皆喜報曰請今進兵韓信乃從齊行彭越兵自梁至諸侯來會遂破楚軍于垓下追項王誅之於淮津二君之功子房之謀也

一作張子房之謀也

漢六年正月封功臣張子房未嘗有戰鬪之功高皇帝曰運籌策帷幄之中決勝千里之外子房功也子房自擇齊三萬戶良曰始臣起下邳與上會留此天以臣授陛下陛下用臣

計幸而時中臣願封留足矣不敢當齊三萬戶乃封良爲留侯及蕭何等其餘功臣皆未封羣臣自疑恐不得封咸不自安有搖動之心於是高皇帝在南陽南宮上臺見羣臣往往相與坐沙中語上曰此何語留侯曰陛下不知乎謀反耳上曰天下屬安何故而反留侯曰陛下起布衣與此屬定天下陛下已爲天子而所封皆蕭曹故人所誅皆平生仇怨今軍吏計功以天下不足以徧封此屬畏陛下不能盡封又見疑平生過失及誅故即聚謀反耳上乃憂曰爲將奈何留侯曰上平生所憎羣臣所共知誰最甚者上曰雍齒與我有故漢書有故怨數窘辱我欲殺之爲其功多故不忍留侯曰今急先封雍齒以示羣臣羣臣見雍齒得封即人人自堅矣於是上置酒封雍齒爲什方侯而急詔趣丞相御史定功行封羣臣罷酒皆喜曰雍齒且侯我屬無恙矣還倍畔之心銷邪道之謀

使國家安寧累世無患者張子房之謀也

高皇帝五年齊人婁敬戍隴西過雒陽脫輅輓見齊人虞將軍曰臣願見上言便宜事虞將軍欲與鮮衣婁敬曰臣衣帛衣帛見衣褐衣褐見不敢易虞將軍入言上上召見賜食已而問敬對曰陛下都雒陽豈欲與周室比隆哉上曰然敬曰陛下取天下與周室異周之先自后稷堯封之邰積德累善十餘世公劉避桀居邠大王以狄伐去邠杖馬策居岐國人爭歸之及文王爲西伯斷虞芮訟始受命呂望伯夷自海濱來歸之武王伐紂不期而會孟津上八百諸侯滅殷成王即位周公之屬傅相乃營成周雒邑以爲天下中諸侯四方納貢職道里均矣有德則易以王無德則易以亡凡居此者欲令周務德以致人不欲恃險阻令後世驕奢以虐民及周之衰分爲兩天下莫朝周不能制非德薄形勢弱也今陛下起

豐擊沛收卒三千人以之徑往卷蜀漢定三秦與項羽大戰七十小戰四十使天下民肝腦塗地父子暴骨中野不可勝數哭泣之聲未絕傷夷者未起而欲比隆成康周公之時臣竊以爲不侔矣且夫秦地被山帶河四塞以爲固卒然有急百萬之衆可具因秦之故資甚美膏腴之地此謂天府陛下入關而都山東雖亂秦故地可全而有也夫與人鬪而不撻其亢拊其背未全勝也高皇帝疑問左右大臣皆山東人多勸上都雒陽東有成皋西有肴澠倍河海嚮伊洛其固亦足恃且周王數百年秦二世而亡不如都周留侯張子房曰雒陽雖有此固國中小不過數百里田地狹四面受敵此非用武之國夫關中左肴函右隴蜀沃野千里南有巴蜀之饒北有故宛之利阻三面守一隅東向制諸侯諸侯安定河渭漕輓天下西給京師諸侯有變順流而下足以委輸此所謂金



城千里天府之國也婁敬說是也於是高皇帝即日駕西都關中由是國家安寧雖彭越陳豨盧綰之謀九江燕代之兵及吳楚之難關東之兵雖百萬之師猶不能以爲害者由保仁德之惠守關中之固也國以永安婁敬張子房之謀也上曰本言都秦地者婁敬也婁者乃劉也賜姓劉氏拜爲郎中號曰奉春君後卒爲建信侯封之二十戶

留侯張子房於漢已定性多疾即導引不食穀杜門不出歲餘上欲廢太子立戚氏夫人子趙王如意大臣多爭未能得堅決者也呂后恐不知所爲人或謂呂后曰留侯善畫計策上信用之呂后乃使建成侯呂澤劫留侯曰君常爲上計今日欲易太子君安得高枕卧留侯曰始上數在困急之中幸用臣今天下安定以愛幼欲易太子骨肉間雖臣等百餘人何益呂澤彊要曰爲我畫計留侯曰此難以口舌爭願上有

所不能致者天下有四人園公綺里季夏黃公用里先生此  
四人者年老矣皆以上慢侮士故逃匿山中義不爲漢臣然  
上高此四人公誠能無愛金玉璧帛令太子爲書卑辭以安  
車迎之因使辯士固請宜來來以爲客時時從入朝令上見  
之上見之即必異問之問之上知此四人亦一助也於是呂  
后令澤使人奉太子書卑辭厚禮迎四人四人至舍呂澤所  
至十二年上從破黥布軍歸疾益甚愈欲易太子留侯諫不  
聽因疾不視事太傅叔孫通稱說引古以死爭太子上佯許  
之猶欲易之及燕置酒太子侍四人者從太子皆年八十有  
餘鬢眉皓白衣冠甚偉上怪而問曰何爲者四人前對各言  
其姓名上乃驚曰吾求公數歲公避逃我今公何自從吾兒  
游乎四人皆對曰陛下輕士善罵臣等義不辱故恐而亡匿  
聞太子爲人子孝仁敬愛士天下莫不延頸願爲太子死者

故來爾上曰煩公幸卒調護太子四人爲壽已畢起去上目送之召戚夫人指示四人者曰我欲易之彼四人輔之羽翼已成難動矣呂氏真而主矣戚夫人泣下上曰爲我楚舞吾爲若楚歌歌曰鴻鵠高蜚一舉千里羽翮已就橫絕四海橫絕四海當可奈何雖有矰繳尚安所施歌數闕戚夫人嗑啼流涕上起去罷酒竟不易太子者留侯召四人之謀也

漢十一年九江黥布反高皇帝疾欲使太子往擊之是時圍公綺里季夏黃公用里先生已侍太子聞太子將擊黥布四人相謂曰凡來者將以存太子太子將兵事危矣乃說建成侯曰太子將兵有功則位不益無功從此受禍矣且太子所與俱諸將皆嘗與上定天下梟將也乃使太子將之此無異使羊將狼也皆不肯爲用盡力其無功必矣臣聞母愛者抱子今戚夫人日夜侍御趙王常抱居上前終不使不肖子居

愛子上明乎其代太子位必矣君何不急謂呂后承聞爲上  
泣言黥布天下猛將善用兵諸將皆陛下故等倫乃令太子  
將此屬無異使羊將狼莫爲用且使布聞之即鼓行而西爾  
上雖疾卧護之諸將不敢不盡力雖苦彊爲妻子計載輜車  
卧而行於是呂澤立夜見呂后呂后承間爲上泣而言如四  
人意上曰吾惟豎子故不足遣乃公自行爾於是上自將東  
羣臣居守皆送至霸上留侯疾彊起至曲郵見上曰臣宜從  
疾甚楚人剽疾願上無與楚人爭鋒因說上曰令太子爲將  
軍監關中諸侯兵上謂子房雖疾彊起卧而傳太子是時叔  
孫通已爲太子太傅留侯行少傅事漢遂誅黥布太子安寧  
國家晏然此四公子之謀也

齊悼惠王者孝惠皇帝兄也二年悼惠王入朝孝惠皇帝與  
悼惠王燕飲乃行家人禮同席呂太后怒乃進鴆酒孝惠皇

帝知欲代飲之乃止悼惠王懼不得出城上車太息內史參乘怪問其故悼惠王具以狀語內史內史曰王寧亡十城耶將亡齊國也悼惠王曰得全身而已何敢愛城哉內史曰魯元公主太后之女大王之弟也大王封國七十餘城而魯元公主湯沐邑少大王誠獻十城爲魯元公主湯沐邑內有親親之恩外有順太后之意太后必大喜是亡十城而得六十城也悼惠王曰善至邨上奏獻十城爲魯元公主湯沐邑太后果大悅受邑厚賜悼惠王而歸之國遂安齊內史之謀也孝武皇帝時大行王恢數言擊匈奴之便可以除邊境之害欲絕和親之約御史大夫韓安國以爲兵不可動孝武皇帝召羣臣而問曰朕飾子女以配單于幣帛文錦賂之甚厚今單于逆命加慢侵盜無已邊郡數驚朕甚閔之今欲舉兵以攻匈奴如何大行臣恢再拜稽首曰善陛下不言臣固謁之

臣聞全代之時北未嘗不有彊胡之敵內連中國之兵也然尚得養老長幼樹種以時倉廩常實守禦之備具匈奴不敢輕慢也今以陛下之威海內爲一家天下同任遣子弟乘邊守塞轉粟輓輸以爲之備而匈奴侵盜不休者無他不痛之患也臣以爲擊之便御史大夫臣安國稽首再拜曰不然臣聞高皇帝嘗圍於平城匈奴至而投鞍高於城者數所平城之厄七日不食天下歎之及解圍反位無忿怨之色雖得天下而不報平城之怨者非以力不能也夫聖人以天下爲度者也不以已之私怒傷天下之公義故遣劉敬結爲和親至今爲五世利孝文皇帝嘗一屯天下之精兵於嘗谿廣武無尺寸之功天下黔首約要之民無不憂者孝文皇帝悟兵之不可宿也乃爲和親之約至今爲後世利臣以爲兩主之迹足以爲効臣故曰勿擊便大行曰不然夫明於形者分則不

過於事察於動者用則不失於利審於靜者恬則免於患高  
帝被堅執銳以除天下之害蒙矢石沾風雨行幾十年伏尸  
滿澤積首若山死者什七存者什三行者垂泣而倪於兵夫  
以天下末力厭事之民而蒙匈奴飽逸其勢不便故結和親  
之約者所以休天下之民高皇帝明於形而以分事通於動  
靜之時蓋五帝不相同樂三王不相襲禮者非故相反也各  
因世之宜也教與時變備與敵化守一而不易不足以子民  
今匈奴縱意日久矣侵盜無已係虜人民戍卒死傷中國道  
路樁車相望此仁人之所哀也臣故曰擊之便御史大夫曰  
不然臣聞之利不什不易業功不百不變常是故古之人君  
謀事必就聖發政必擇語重作事也自三代之盛遠方夷狄  
不與正朔服色非威不能制非強不能服也以爲遠方絕域  
不牧之民不足以煩中國也且匈奴者輕疾悍亟之兵也言

牧爲業弧弓射獵逐獸隨草居處無常難得而制也至不及  
圖去不可追來若焱風解若收電今使邊鄙久廢耕織之業  
以支匈奴常事其勢不權臣故曰勿擊爲便大行曰不然夫  
神蛟濟於淵而鳳鳥乘於風聖人因於時昔者秦繆公都雍  
郊地方三百里知時之變攻取西戎辟地千里并國十二隴  
西北地是也其後蒙恬爲秦侵胡以河爲境累石爲城積木  
爲寨匈奴不敢飲馬北河置烽燧然後敢牧馬夫匈奴可以  
力服也不可以仁畜也今以中國之大萬倍之資遣百分之  
一以攻匈奴譬如以千石之弩射癰潰疽必不留行矣是則  
北發月氏可得而臣也臣故曰擊之便御史大夫曰不然臣  
聞善戰者以飽待飢安行定舍以待其勞整治施德以待其  
亂按兵奮衆深入伐國隋城漢史作以飽待飢正治以待其亂定舍以待其勞故按兵奮衆伐國隋城故常坐而役  
敵國此聖人之兵也夫衝風之衰也不能起毛羽彊弩之末



力不能入魯縞盛之有衰也猶朝之必暮也今卷甲而輕舉  
深入而長驅難以爲功夫橫行則中絕從行則迫脅徐則後  
利疾則糧乏不至千里人馬絕飢勞以遇敵正遣人獲也

至千里人馬之食  
兵法曰遺人獲也

意者有他詭妙可以擒之則臣不知不然未見深

入之利也臣故曰勿擊便大行曰不然夫草木之中霜霧不  
可以風過清水明鏡不可以形遮也通方之人不可以文亂  
今臣言擊之者固非發而深入也將順因單于之欲誘而致  
之邊吾伏輕卒銳士以待之陰遮險阻以備之吾勢以成或  
當其左或當其右或當其前或當其後單于可擒百全必取  
臣以爲擊之便於是遂從大行之言孝武皇帝自將師伏兵  
於馬邑誘致單于單于旣入塞道覺之奔走而去其後交兵  
接刃結怨連禍相攻擊十年兵凋民勞百姓空虛道殣相望  
櫛車相屬寇盜滿山天下搖動孝武皇帝後悔之御史大夫

桑弘羊請佃輪臺詔卻曰當今之務務在禁苛暴止擅賦今乃遠西佃非所以慰民也朕不忍聞封丞相號曰富民侯遂不復言兵事國家以寧繼嗣以定從韓安國之本謀也

孝武皇帝時中大夫主父偃爲策曰古諸侯不過百里疆弱之形易制也今諸侯或連城數十地方千里緩則驕易爲淫亂急則阻其疆而合從謀以逆京師今以法割之即逆節萌起前日晁錯是也今諸侯子弟或十數而適嗣代立餘雖骨肉無尺地之封則仁孝之道不宣願陛下今諸侯得推恩分子弟以地侯之彼人人喜得所願上以德施實封其國而稍自消弱矣於是上從其計因關馬及弩不得出絕遊說之路重附益諸侯之法急註誤其君之罪諸侯王遂以弱而合從之事絕矣主父偃之謀也

新序卷第十

康熙庚寅借義門師校正本對勘師本乃從憩播  
巷李氏借得陽山顧大有舊藏宋槧本校定也

七月八日杲記

康熙丁酉六月得傳是樓宋本錄牧翁題識復改

定十餘字

杲又記

從緒琴末己獲子繡校  
本繕錄上版體中款正

吳門徐元圃刻

右劉向新序十卷。隋唐志俱三十。通考祇十卷。曾子固序其略曰。向所集次新序三十篇。錄一篇。隋唐之世。尙爲全書。今可見者。十篇而已。此書最爲近古。雖不能無失。然遠至舜禹。而次及於周秦。以來古人之嘉言善行。往往而在。而惜乎其所關二十篇。竟無得而考也。謨嘗徧覽唐宋人類書。所引新序。亦頗有今本所不收者。而其文皆不全。惟三國志劉虞傳。注引新序云。趙簡子欲專天下。謂其相曰。趙有犢犢。晉有鐸鳴。魯有孔丘。吾殺三人者。天下可王也。於是乃召犢犢。鐸鳴而問政焉。已卽殺之。使使者聘孔子於魯。以胾牛肉。迎於河上。使者謂船人曰。孔子卽上船。中河必流而殺之。孔子至。使者致命。進胾半之肉。孔子仰天而嘆。下乃云云。具有首尾。而其文踏駁。若未可信。第以胾牛故事語人。未有不茫然者。故亦復識之。以補史記家語之闕。若其所引楚共王逐申侯。晉文公遇欒武子。葉公諸梁問樂王鮒。王伯厚已與說苑同譏。傳記若此者衆。又不勝辨也。此與說苑列女傳俱在漢志劉向所序六十七篇內。但班固原注尙有世說書不傳。而後世所傳列仙傳三卷。又不在此數內。今祇仍叢書舊本。校刊新序說苑。其列女列仙二傳。尙當采而續之云。汝上王謨識。